


南澗甲乙稿
附拾遺

一





南澗甲乙稿

附拾遺

(一)

韓元吉撰

南澗甲乙稿目錄

卷一……………一

賦三首

擬騷一首

五言古詩七十九首

卷二……………二五

七言古詩二十八首

卷三……………三七

五言律詩一百十五首

卷四……………五一

七言律詩八十九首

卷五……………六九

七言律詩八十八首

五言排律四首

卷六……………八九

五言絕句十二首

六言絕句三首

七言絕句一百八十四首

卷七……………一〇九

詞六十四首

卷八……………一二五

表五十三首

牋三首

卷九……………一四七

狀二十六首

卷十……………一七一

劄子二十二首

卷十一……………一九三

進故事十三首

議十一首

策問一首

卷十二……………二二三

啓二十五首

書十六首

卷十三……………二三七

書十四首

卷十四……………二五九

序二十二首

卷十五……………二七九

記十九首

卷十六……………三〇三

記十三首

題名二首

題跋二十八首

卷十七……………三二七

論十六首

辨一首

說三首

考一首

卷十八……………三五三

銘十首

贊三首

文十二首

祭文二十首

卷十九……………三七三

碑銘五首

卷二十……………三八七

墓誌銘十一首

卷二十一……………四一七

墓誌銘十一首

卷二十二……………四四五

墓誌銘十首

墓表一首

行狀一首

臣等謹案南澗甲乙稿宋韓元吉撰元吉字无咎開封雍邱人南渡後流寓信州之上饒集中自署曰潁川不忘本也元吉宋史無傳陳振孫書錄解題稱爲門下侍郎韓維元孫江西通志則以爲韓維之子考宋史維本傳卒于元符元年而集中繫辭解序云淳熙戊戌年既六十有一則元吉生時自在徽宗重和元年上距元符元年戊寅凡二十年安得爲維之子集中又有高祖宮師文編序稱紹聖中公謫均州又稱建中靖國以來追復原官與維事迹一一相符知江西通志爲誤當以陳氏爲是矣陳氏又稱其初與從兄元龍皆試詞科不利後官至吏部尙書而不詳其事迹今據其赴信幕詩知初爲幕僚據其送連必達序知嘗爲南劍州主簿據其凌風亭題名知嘗知建安縣據其謝表狀劄知在外嘗爲江東轉運判官兩知婺州又知建甯府在內嘗權中書舍人守大理寺少卿爲龍圖閣學士爲待制爲吏部侍郎中間一使金國兩提舉太平興國宮及爲吏部尙書又晉封潁川郡公而歸老于南澗因自號南澗翁併以名集南澗者一在建安城南爲鄭氏別業見本集詩序一

在廣信溪南。見書錄解題。考元吉宦于閩中。家于江右。似乎非建安之南澗。當以廣信爲是也。元吉本文獻世家。據其跋尹焞手迹。自稱門人。則距程子僅再傳。又與朱子最善。嘗舉以自代。其狀今載集中。故其學問淵源。頗爲醖正。其他詩文酬酢者。如葉夢得、張浚、曾幾、曾丰、陳巖肖、龔頤正、章甫、陳亮、陸游、趙蕃諸人。皆當代勝流。故文章矩矱。亦具有師承。其壻呂祖謙。爲世通儒。其子名澧。字仲止者。亦清介自持。以詩名于宋季。蓋有由矣。朱子語類云。无咎詩。做著者。儘和平。有中原之舊。無南方囁嚅之音。誠定評也。集本七十卷。又自編其詞爲焦尾集一卷。文獻通考並著錄。歲久散佚。今從永樂大典所載。總哀爲詩賦六卷。詞一卷。文十五卷。統觀全集。詩體文格。均有歐蘇之遺。不在南宋諸人下。而湮沒不傳。殆不可解。然沈晦數百年。忽出于世。炳然發翰墨之光。豈非精神光采。終有不可磨滅者。故靈物塢訶。得以復顯于今日歟。乾隆四十六年十一月恭校上。

總纂官內閣學士臣紀 昀

光祿寺卿臣陸錫熊

纂修官翰林院編修臣吳 典

南澗甲乙稿卷一

宋韓元吉撰

賦

萬象亭賦有序〔案〕集中葉少保詩注云。公在閩中作萬象亭。某爲之賦。則此題應有亭字。原本脫去。今據補。

紹興十有三年。石林先生自建康留鑰移帥長樂。惟公以文章道學伯天下。推其緒餘。見于政事。時閩人歲饑。餘盜且擾。曾未易歲。旣懷且威。倉廩羨贏。野無燧烟。民飽而歌。乃闢府治燕寢後。築臺建亭。蓋攬四山之勝。字曰萬象。公時以宴閒臨之。命賓客觴酒賦詩。以紀一時之盛。某適以舊契之末。獲拜公于庭。知邦人之德公。而公之能與共樂也。退而爲之賦。其詞曰。

石林先生治閩之初。邦人詠歌。延覽登眺。臨城之阿。面長江之迴旋。俯重嶠之嵯峨。翦凡草于荆杞。發層臺之新基。收攬宇宙以萬象而目之。先生曰。天地之內。所謂景與物者。不可以旣也。方其交于吾前。而其象無窮。觸于吾心。而其意無窮。惟達者可以道會。而不可以知通矣。斯亭也。處于戶庭重複之末。而出于閭闔膠擾之中。危梯直上。十尋倚空。窺井邑之鱗次。張九衢之飛塵。聳聲畫起。人烟繽紛。勗絲竹之餘響。

郁椒蘭之清芬。當其連山如環。秀色四出。林巒鬱其映帶。烟雲度而髣髴。陰晴變態。所獲非一。極東南而凝睇。莽游目于窮髮。海波蕩漾。蛟龍驚踊。粲朝日之初升。數山川于異域。颶風角于天際。卷千帆之飄忽。或一瞬而千里。或窮年于咫尺。瞻雲鵬之獨運。哀斥鷃之短翼。天池修其九萬。羌決起于蒿藜。（案）莊子。我決起而飛。搶榆枋。又云。翱翔蓬蒿之間。此運用其語。而改蓬蒿爲蒿藜。考詩傳。萃藜蕭也。郭璞曰。今藜蒿也。義與蓬蒿可通。但藜是九泰韻。與上下句用陌錫通叶者不合。疑有誤。自鷗去而西飛。澹長烟之遠沒。田疇俯見。禾黍如積。耕夫耦而長謠。牛羊散于沙磧。餘霞被于林杪。明月皎其東壁。掛北斗于欄楯。瀉銀漢于雉堞。披風露之冷爽。想飛仙之來接。聽鷄犬于雲中。奏笙簫之激越。歎佳賞之奚盡。雖妙意其莫述。惟吾與之所寓。與彼物而相得。故可以追閬風之遊。而謝華胥之國也。客有聞而歎曰。嗟嗟先生。百代之英。玉堂金馬。載蜚厥聲。厭帝所之鈞天。斂光芒于一藩。而餘風所被。猶足以息潢池之盜。而慶高廩之豐年矣。今夫此邦之形勢。最于八州。繚周垣其百里。渺澄瀾而爲溝。三峯峙而鼎足。蓋有類夫蓬萊與瀛洲。自無諸迄今。千有餘載。中更王氏。窮修自泰。異時離宮別館。乘山矚海。而今之所存。大則浮屠老氏之室。小則公卿大夫之廬。鳴鐘相聞。擇勝以居。飛欄危榭。往往而在。倚巖壑之幽清。翳松檜其掩藹。雖一斑之或見。曾未若斯亭之宏大。碧油畫戟。來藩此府。往賢近臣。蓋已百數。慨登臨之遺跡。咸褊陋而無取。獨先生至而有之。舞山光于簾幙。御地勢之襟帶。雜支離之萬種。爛錦幄其旆旆。薦醺醺于樽俎。剝珍錯之螺貝。發角徵之清唱。挽行雲于天外。使邦人聚觀。白首驚拜。豈吾先生浩然之氣。六合爲隘。蟠萬象于胸

中耿星辰而不昧。遇至美而一發。借佳名以自快。而景物之來。適際其會。彼千古而莫識。信一時之有待者耶。于是先生聞之。輒然而笑。衆賓避席迭起爲壽。

拙蠶賦 壬寅年作

韓子晨起。視牕中有物延緣。投隙抵穿。口如飛蛛。足若蟄蚊。呼嫗輩問之。嫗笑曰。是拙蠶也。絲疏而弗績。食飽而嗜眠。亡所用旃。戲置此焉。韓子感而賦之曰。繫樗櫟之不材兮。信能保其天年。豈有用之則貴兮。抑不用之或偏。吁造化者奚私兮。盍亦賦之自然。惟桑蟲之何知兮。生蠶蠶而比肩。資採摘而不自養兮。甘鼎鑊之烹煎。大則施于紈綺兮。細則麗爲純綿。雖曰衣被四海兮。猶爲蟪蛄之所憐。方衆巧之競驚兮。萬族仰哺而爭先。何繭栗之弗爲兮。恥營軀而自纏。匪畏死而遁逃兮。將羽化而飛翾。宜婦姑指以爲拙兮。塞冥心于棄捐。彼莊生取喻于犧牛兮。支離攘臂于兵間。不能務悅于人兮。殆亦自全其天。聖有抱璞而深藏兮。時有不爭于尙賢。粵撫檻而三歎兮。吾亦樂乎太玄。

湘竹賦

余懷古而不見兮。將弔舜于九疑。望湘江之沅沅兮。憚褰裳而涉其涯。款二女于叢祠兮。庭有翠篠而參差。晚枝榦之爛熳兮。淡猩血之淋漓。手欲觸而不敢兮。心欲置而復思。故老諗余以前聞兮。此皇英之淚痕。帝遐征而不復兮。淚潺湲于竹根。朝日暴而不滅兮。嚴霜洗而不昏。度淒風之蕭瑟兮。如有餘哀之遠聞。彼聖人其亡欲兮。豈曜嬖而惑私。雖嫠者其抱情兮。何一哀之至于斯。夜將寐而太息兮。夢恍惚其見

之。委玉佩以弦琴兮。有美一人其頤。顰青蛾而啓皓齒兮。肅予前而致辭。曰。吾父之至仁兮。擇吾嬪于有虞。惟虞之能繼帝兮。功甚巍而不居。藝稷黍于艱難兮。派百川而東駛。制禮樂與法度兮。世蓋躋于極治。憂勤終以損壽兮。南巡五月其未已。乘白雲以逍遙兮。無復帝車之可還。悼予躬之至弱兮。撫予涕而長嘆。考殂落而夫逝兮。予之息又不令。天下其將安歸兮。生民又焉取正。息既不任于養兮。嗟予死其孰瘞。天旣高而莫升兮。地之厚其可入。蹇念此以長號兮。涕交墮而弗知。滋草木以如雨兮。與江水之爭流。惟此君其諒余兮。含余淚之莫收。歷千祀而弗改兮。亦其節之素修。彼昧者其騰口兮。殆妃嬪之後先。抑予哭猶罔于夜兮。顧于此則豈然。嗟神言之諄諄兮。菴不知其夢也。且端拂以求諸神兮。雖龜莢其不貳也。退而告于君子兮。咸舉以爲信也。遂再拜而謝之兮。吾將敬而植此也。

擬騷

騷鳳辭

我家旣遠兮。苕水爲鄉。中有騷鳳兮。飛頤頤。朱爲冠兮。黼爲裳。五色炳兮。耀文章。音律呂兮。韻宮商。竹不實兮。梧則僵。翳兼葭兮。飫稻粱。虞舜作樂變在堂。集阿閣兮。麗朝陽。胡爲去我兮。天一方。友鳬雁兮。侶鷺鷥。吁嗟鳳兮。其來翔。

五言古詩

遠遊十首

我行蓬萊巔。俛首見月窟。誰言滄海深。涉之不濡轡。頽波驚魚龍。起舞相蕩潏。衆眞爲一笑。黃霧生絳闕。獨乘風中天。蹙踏波上月。東隅有神人。被髮兩目丹。手擎扶桑枝。騰光射乾坤。朱鳥爲前驅。火龍駕後軒。祝融不敢瞬。衛以千炎官。誓當掃霜霰。九寓常不寒。飄出九地底。化爲萬鼓鞀。豕首柄石斧。剗然四海馳。蜺魑與罔象。辟除靡有遺。無私乃帝令。風雨多隨之。苟能仆夷伯。何怨兒女爲。宋皇宴瓊臺。鳳舞鸞且歌。翠鬢兩仙女。倚歌奏雲和。秀色炯雙璧。晴雲灑秋波。曲終顧我笑。奈此人間何。贈以白玉環。綢繆期匪他。大鈞轉一氣。急轂無停輶。是非與生死。膠擾于其間。朝昏互變滅。倏忽千萬年。豈知達道人。直作須臾觀。天地本無物。置之奚足言。海水赴大壑。雷奔墮空虛。火輪煽金剛。蕩然爲尾閭。一闔復一關。乾坤猶戶樞。萬生保靈根。至神守虛無。嘗以物所歸。返觀天地初。

崑崙九萬里。磅礴天地根。其下有玄圃。茲惟衆仙門。翩然兩白鶴。道我前飛翻。問津牽牛星。濯足洪河源。九關幸方闢。乘之遊紫垣。巨軸載厚地。沈沈惟九幽。日月所不燭。鬼神或拘囚。負臣與支祁。亦爲舜禹憂。覩彼世上兒。對面行姦偷。國章幸可脫。天刑此焉投。生死一大夢。夢覺誰當分。夢中既不了。雖覺何足云。天光發吾宇。澹然無朝曛。至樂不外假。至貴斯無文。求仙與學佛。舉世徒紛紛。呼吸爲陰陽。動靜乃天地。猶然一身間。至理無弗備。蒼能駕白虎。晝夜分六氣。坎離會精神。否泰本仁義。吾亦不吾欺。持以御一世。

戊辰二月清明後三日見葉丈于石林承命賦詩作古風一首〔案〕葉少蘊字夢得石林其居也少蘊爲元吉前輩故稱葉丈原本作文鶴今改正。

東風易陰晴。一雨曉便止。捨舟欣徐行。鳥鵲聲爲喜。峩嶢石林谷。蒼翠間紅紫。丈人厭調元。玩意丘壑裏。鄭公化鄉閭。鄴侯盛圖史。千載發詞源。一點詣真理。霞裾月中仙。珠履天下士。時從詩酒樂。不負湖山美。方瞳照玄髮。眉壽端自此。緬懷西湖春。荆棘迷故里。兩髦看公遊。玉節旋屢弭。風塵三十載。碌碌類餘子。晚登載欣堂。警效聞正始。榆枋望天池。奮迅思決起。常謀白雲居。敢援赤松比。臨流整游觀。三沐聊洗耳。

子牟居江湖而有魏闕心。方朔待金馬。與世相浮沈。古來曠達士。豈必棲山林。吾兄官湖南。一室橫古今。朝披祝融高。暮涉湘水深。間爲漫郎飲。戲效愚溪吟。聖賢雖云邈。彝訓夙所欽。斗水幸見收。西江等蹄涔。吁嗟咸陽市。黻黼希千金。應攜忘言子。一和無絃琴。

題畫卷

少年喜登臨。兩脚不憚軟。支筇上雲山。得酒輒三返。自從老將至。所向意先懶。豈惟心事乖。要自脚力短。不如空齋坐。此畫一舒卷。超然函丈間。意作千里遠。漁舟已逍遙。茅屋更蕭散。江干所遊歷。物色猶在眼。浮生固幻景。況乃幻中幻。低頭顧吾廬。何如住山澗。

梵隆大師乞詩隆能琴阮爲鼓數行

扁舟望涵山。一塔白雲裏。東西互迎送。目盡三十里。前有布金園。軒牕面流水。上人富願力。物物盡經始。莊嚴萬人緣。功就只彈指。空齋了無事。鳴琴對清泚。游魚應朱絃。萬籟入流徵。我來不忍去。一聽賞幽耳。雨餘新月上。雲物紛可喜。莫作箕山吟。秋風坐中起。

逢人

逢人似相識。初不辨名字。折腰致寒暄。但道久睽異。歸來省眉目。髣髴猶夢寐。自非知心交。君輩定難記。將無半面別。正恐呼聲似。中年況多忘。錯認固無意。典刑要深思。摸索豈難事。尙想睢陽公。一見了奴隸。寒食前三日。攜家至丁山。

春事已過半。豫懷風雨憂。苦無親朋樂。自攜兒女遊。丁山峙城南。老稚載一舟。狹徑登詰曲。軒牕居上頭。遐觀接去鳥。俯視臨清流。溪花正爛漫。堤柳綠且柔。杳靄煙雲間。前瞻帝王州。田野亂碁布。山川莽相繆。病妻不能飲。取酒自勸酬。鮮妝誰家婦。造席爲我謳。風光亦可醉。景物似見留。惜無百金資。買此林壑幽。歲月實易得。里閭尙沈浮。歸來暮鐘響。蘋風動滄洲。

上巳日王仲宗趙德溫見過因招趙仲縝任卿小集以流水放杯行分韻得行字

春事修已晚。飛花送啼鶯。長安三月三。水邊盡傾城。緬懷杜陵老。感之見歌行。青鳥忽飛去。素鱗盤水清。往事誰復識。夢繞白玉京。竭來官閩陬。江湖渺餘情。嘉節閉門臥。客愁隨日生。風光入樽酒。使我嗟獨傾。良友慰寂寞。惠然成會并。金枝三雋才。千里未可程。王郎烏衣舊。高論玉塵橫。相逢寄觴詠。樂此天氣清。不知山陰會。絕唱疇能賡。庭隅有幽花。粲若萬玉纓。好風亦知人。微月相與明。蕭蕭城東路。頗復歌吹聲。景物正自佳。天涯意難平。不須恨陳迹。且用催詩成。

上巳日與客遊張園

簿書有餘閒。春日亦已永。況逢佳節休。朱墨得暫屏。名園跨江郊。危檻俯千頃。平蕪雨初勻。弱柳風自整。芳尋寄蕭散。意適忘醉醒。持觴挹花色。散策步林影。雖無歌舞妍。所愛亭館靜。佳辰天氣清。泉水助幽令。緬懷山陰會。脩竹帶崇嶺。應知佳客臨。懷抱均一聘。君看結綺地。茨棘翳簪井。當時擘牋人。正復對此景。江山幾興廢。歲月侵老境。但願中聖賢。疇能計鐘鼎。

避暑靈泉分韻得水字

閒居亦無營。歲月駛流水。適聞新蟬鳴。杳暑遽如此。佳哉二三友。久要復鄰里。憐我疾病除。慰我懷抱喜。居然肯見顧。岑寂聊啓齒。空山百無有。翠阜映清泚。幽泉俯伴月。盎盎眞石髓。坐久得清涼。山餅還屢恥。一杯樂所遇。靜勝有眞理。誰能走懸箔。賭門趁朝市。炎歊不可觸。暑雨欣漸止。幸有故人風。相過時洗耳。

七夕與孟壻約湯朝美率徐行中遊鶴山

城市競時節。幽尋固難同。舊聞鶴山奇。欲往歲屢窮。茲辰尙殘暑。夙駕乘西風。楚俗候飛鵲。階庭鬧兒童。誰能事針縷。覓巧瓜果中。起攜東牀友。況得下榻翁。青蒲有傑客。放懷適相從。一招雲中仙。共呼潭底龍。翠壁聳巒岑。龜魚澹遊空。泉源幾萬斛。石竇藏豐隆。久知神物交。解致零雨濛。我田甚無多。例思年穀豐。公才正類此。時至會有庸。竹間小招提。閨靜無鼓鐘。枕石漱甘井。荔丹啓筠籠。若據兩石羊。摩挲古狄銅。高談劇霏屑。壯氣吹長虹。可無樽酒綠。遂使老頰紅。醉語或不省。嘯歌亦春容。歸歟興難盡。月明照風松。雪中以獨釣寒江雪分韻得獨字

常年待三白。此語未免俗。誰言歲將徂。一雪自云足。魃妖與癘鬼。不待巫茆逐。初喜沒馬蹄。還驚上牛目。三日雪不休。冰澌被茆屋。我貧固無事。尙賦一囊粟。長飢望年登。政恐麥不宿。天公豈相揄。饋以萬頃玉。朝來一堪煮。茗椀薦新菊。牕中有佳致。一水臥寒綠。城闌閒在眼。況復見巖谷。相過二三子。共喜醅甕熟。狂歌且暫醉。夜半還秉燭。猶勝杜陵翁。山中掘黃獨。

雪中從邢懷正乞酒

楓具高挂頰。風塵客長安。長安不宜客。歲暮仍苦寒。夜閉陰風喧。曉看雪漫漫。天公非惡劇。笑我貂裘單。坐令歌南山。白石空巘岼。正不妨我嘯。憑高事遐觀。四海同一雲。更覺天地寬。平湖發遠景。松竹如龍鸞。巉然兩峯高。玉峙峨瓊冠。緬懷邢公子。重城有家園。水石帶林沼。幽亭厭雲端。仙粧映疏梅。秀色若可餐。璇題散冰筍。晶鹽貯牙盤。清歌出絕唱。筆間走波瀾。幾欲泥君飲。持杯聽幽蘭。君家碧琳腴。到手無復殘。正豈須羔兒。尙能追清歡。寒驢不敢出。強作哦詩酸。詩成不能寐。起舞清夜闌。儻可致麴生。當饌白玉壇。

自國清寺至石橋

出郭天氣陰。驅車日亭午。漫漫山中雲。猶作衣上雨。仙山八百里。勝槩隨步武。稽首金地尊。棲心玉京侶。淨空方廣寺。樓殿若可睹。石梁瀉懸流。下有老蛟怒。我來淨焚香。千花發茶乳。擬訪林下仙。飛來但金羽。巖泉道中

出郭心易清。看山眼難飽。疏疏水中梅。殘雪相與好。歲華云已晚。官況良自笑。日暮城東門。霜風動衰草。

龍谿巖丙寅年作

蒼崖兩分張。絕壁千丈起。溪流忽奔注。萬石相披靡。跳波作驚雷。跬步清見底。攀藤上巉巖。卻立半空裏。幾年天師廟。欄柱岌無址。幽禽答遠響。山花亂紅臙。我來不知疲。危棧劣容履。同僚具壺觴。脚軟正須此。塵埃得遐矚。真賞契心耳。只應潭中龍。見客亦驚喜。

寒巖分韻得水字

青山如幽人，不肯住城市。客從城市來，一見消吝鄙。平時與周旋，況復非俗士。我初見南山，秀色紛可喜。謂言官塵埃，洗滌端在此。經時未一至，引望若千里。昨朝得休暇，佳興難自己。秋原麗新晴，景物爲清美。獨遊已不惡，更約二三子。初從澗壑危，稍入巖石倚。白雲隨杖藜，蒼煙生屐齒。主翁亦好事，結茆脩竹底。庭空百無有，屈曲但流水。客來了不問，花草自紅紫。豈無一樽酒，欲飲還遽止。歸鞍不可速，吾亦聊洗耳。

松江感懷

忽忽倦行役，栖栖問窮途。生涯能幾何，所抱詩與書。淒涼吳松路，不到十載餘。當年路傍柳，半已陰扶疏。繫舟上高橋，春水正滿湖。鷗鳥如有情，見人遠相呼。境豁目爲縱，興長心特舒。尙想張季鷹，此焉賦歸歟。生前與身後，底用論區區。但當酌美酒，一鱸江中鱸。

丁丑仲春將度浙江從者請盤沙予畏而不許既登舟乘潮以濟中流膠焉捐十金募數力竟至沙上僅達西興狼狽殊甚從者笑之感而賦詩

桑田變東海，此語聞自昔。嗟我百年人，耳目詎能識。誰言錢塘江，遂有車馬跡。漲沙莽雲屯，衣帶僅尋尺。我初未渠信，束轡俟潮汐。是時月既望，春晴好風色。同舟二三子，擊楫意頗適。中流類坳堂，竟作膠柱瑟。褰裳亂濤波，植杖負囊笈。居然濯我足，長堤慰行客。西興忽在眼，喚渡猶頃刻。鯤鵬定何之，魚龍豈遷宅。斜陽照高岸，得酒餞寒濕。平生忠信懷，對此徒感激。翻成僕奴笑，撫事吁莫測。莫問曲池平，空悲峴山側。

望靈山

嶽鎮古所錄。茲山諒其遺。憶從西江來。恍惚欣見之。初疑春雨晴。雲物出怪奇。稍稍對巖壁。森森面嶺奇。紛紜類列障。散漫如連帷。磅礴千里間。衆景皆奔馳。頗訝地軸湧。未覺天柱虧。不讓崑崙高。遂使秦華移。諸峯七十二。磊砢略可推。駢觀擁佛髻。遠睇凝婦眉。大或覆鐘鼎。細亦銛刀錐。石櫃一何高。梯天此爲墀。崩騰鐵馬羣。中有大將旂。身居萬石貴。氣壓累卵危。雄傑亦莫狀。清深亦餘姿。蛟螭護絕磴。草木忘四時。豈知水晶宮。閼藏神所司。陰崖彼何靈。頸斷不敢悲。

建安城南鄭氏居。號南澗。山水甚幽。予始至。欲遊。率奪以事。秋九月。事少閒。前二日。折簡招客。客半辭。旣命駕。辭者復先在。相與追逐。詰曲由田中。梁溪並山麓。隘不可輿行。二百步始得寒巖磴。犖确羊腸而上。鉅竹生石間。舉武疲曳休。小亭至上方。牕戶明邃。從疎林瞰遠山。如綺疏中。望通衢也。西漸走水。養魚植菖蒲。石上纖巧可愛。有僧臘甚云。山故銅冶也。指其穴已。爨篝火之跡。亦猶在山半。有巖隔小澗。橋壞不可越。門有水閣。平田秋色稼穡彌望。主人畏客戒勿置酒。因取茶烹之。求觀其囿。三返僅得入。則流觴亭初爲坳。沼亭中稍集。亭下水車輪轉。別亭俯方池。環植海棠。少坐。日已西。攜酒詣開元僧廬。絕溪而南。中流見城市。水面平直如大江。舟銜尾。漿聲相上下。意樂之集。丹青閣閣底巖桂盛開。面之置樽俎。將登陸羽亭。憊不果取泉試小春新芽。舉白歡甚。分韻賦詩。明日又以

秋氣集南澗爲韻自賦五首云

朱墨日過眼。溪山誰復遊。夜聞西風喧。起看天地秋。王事有休沐。駕言指林丘。新晴鳥鳥樂。路入南澗幽。高峰左右列。野水縱橫流。問舍苦不早。求田亦良謀。高岳跨層巔。一徑入蒼翠。三休徹上頭。卻立睨平地。當年寶藏興。中夜出光氣。至今石縫裂。篝火尙能記。盈虛誰可測。開闢神自秘。空房有殘僧。骨冷夜無寐。入山衣屨寒。出山衣屨濕。初迷煙雨來。稍識雲氣集。空濛掠面過。可玩不可執。不知市廛地。去此凡幾級。青松入長望。白鳥伴危立。冷然笑身世。萬事何汲汲。有酒不得飲。呼船過溪南。溪南亦何好。古寺依晴嵐。上有百尺樓。下有千丈潭。城闔一目盡。晚山日相銜。烹茶弔陸子。蠟屐登巉岳。相逢作行樂。猶勝空坐談。秋風何時來。午暑忽已散。娟娟木犀花。弄藥亦璀璨。清香不自惜。擁鼻得奇觀。古來達道人。至樂在山澗。藝蘭與種蕙。採掇契幽願。置此勿復言。吾方困遊宦。

李仲鎮懶窠癸未年作

我性天下懶。自謂世莫雙。竭來官中都。懶極濟以瘳。有如子黑魚。東西轉橋缸。又如囊駝臥。厭逐羣吠虬。鼻漢任縱橫。胞轉徒降肛。紛紛夸奪兒。見我語輒嗤。平生李公子。老大同鄉邦。奈何奪我有。收斂付一牕。作窠寓以名。異音乃同腔。金馬可避世。何殊鹿門龐。君看富貴塗。機危甚緣橦。爭榮僅錙銖。力欲九鼎扛。金朱擁丹轂。視之亦螻蟻。愛君陽羨居。有田種蘭芷。溪山帶城郭。松竹環旌幢。連娟幾脩眉。清歌艷明缸。

客至卽盡醉。不待金石撞。尙餘詩語工。詞源倒三江。好懶得真懶。使我心益降。何時半作分。臨流聽琤淙。
趙仲績梅川

堂前面羣山。堂下俯流水。揚雄一區宅。歲晚何在此。將無山水佳。更爲風物美。城隅三家渡。華屋照清泚。舉手招梅仙。低頭叫陸子。前松後梧竹。左桂右蘭芷。江花漾茶甌。巖樹排棐几。客來索無有。樽酒間圖史。不作隱士廬。合號君子里。吾人天潢秀。時至常決起。飽餐南嶽芋。閒曳東郭履。山名不負儂。因之得名字。彈冠可前卜。問舍眞早計。笑殺陶淵明。酒資良未遂。

題鄭舜舉蔗庵

吾州富佳山。脩竹連峻嶺。居然縛塵埃。一見輒心醒。豈知刺史宅。跬步闕清景。古木盤城隅。石徑幽且迴。當年徐常侍。坐愛雲水冷。溪南羣峰秀。蟲蟲雖出穎。鄭公閉閣暇。獨步毘廬頂。曰此氣象殊。逍遙步方永。喚客倒清樽。燃薰煮奇茗。庭空無一事。賓吏絕干請。佳處由漸入。斯語煩記省。淵明嘗有語。結廬向人境。恍如白蓮社。揮塵對宗炳。誰云忙裏閒。要識動中靜。我來款妙論。散策步林影。心田豁叢茅。氣馬罷征騁。他時記棠陰。老意亦深肯。

朱元晦清湍亭

青山足佳遊。遠睇欲無路。稍尋絕澗入。始辨雲間樹。泉聲若招客。倚杖得夷步。驚湍瀉亂石。激激有清趣。

題潘叔玠家達觀亭

車塵蔽重城。俯首但闐闐。誰知達觀亭。自與空闊對。青山接簷楹。白塔見雲外。迢遙眼界淨。妙處心境會。平生九垓期。洗耳聽天籟。一爲簿領縛。局促無可奈。每憑君家欄。曠若解鈴鈇。躋攀得遐矚。頓覺天宇大。頗慚北山移。欲賦楚臺快。泰然發天光。閒目了無礙。

列岫亭用范伯升韻

自我來南溪。池塘幾春草。結茅依雲端。愛此山四抱。奇峯七十二。羅列景逾好。豈殊謝公牕。澄江更縈繞。孤城千家邑。一目可盡了。植葵思夏深。種菊待秋杪。物華靜中見。至理得深造。東山與魯郊。底用評大小。平生丘壑心。計拙詎能巧。亭臯遠俗客。曳杖日頻到。簞瓢樂未改。在澗槃亦考。況有吾人詩。飄然異郊島。

凌風亭〔案〕集中有凌風亭事狀。

西山如層城。壁立有堅對。逶迤雉堞出。一水相縈帶。誅茅發頽垣。偶與嘉景會。天風無邊來。雲日爲破碎。誰能了蘋末。直欲跨鵬背。飄然壓塵土。九壤真一塊。王喬幸齊驅。禦寇亦同載。不知吏役縛。且樂公事退。春光到花木。欄檻愜清快。相期睨南溟。整我飛霞佩。

丹青閣

傑閣跨虛壑。危欄轉層峯。城郭麗朝暉。山水涵秋容。幽尋適暇日。況有佳客從。微官厭趨走。野性便疎慵。少據泉石願。一洗塵埃胷。卻上陸羽亭。裊裊踏風松。東軒俯喬木。高花爛芙蓉。感此節物換。愧爾樵漁蹤。

清談且蕭散，酌飲亦時供。興闌勿遽嘆，勝遊當復重。

清暉閣

臺府填都會，乃與山水期。青溪帶秦淮，渺若萬頃陂。主公金閨舊，官曹日追隨。閉閣理萬事，朱欄俯漣漪。晴波納遠景，搖蕩扶桑枝。浩然江湖興，頗與魚釣宜。風月朝暮佳，軒牕有餘姿。向來非無人，未發此段奇。嗟我老病軀，時來矚須眉。停杯待舉網，屢醉倒接羅。意適反無語，欠公壁間詩。只今入幽夢，官居類雞栖。公亦那人留，濯纓詠來思。不知鳳凰沼，何如習家池。新霜著羣木，歸舟颺旌旗。寄言坐上客，酒至幸勿辭。

溪山堂次韻

幽人誰與娛，作堂面溪灣。堂中有山色，朝暮來雲間。正作杜老狂，頗異韓子姦。超然物外景，便覺非人寰。登臨得遐矚，似破天壤慳。詩成隱几笑，溪山亦開顏。繚繞明鏡中，參差蛾髻鬟。苦無俗客語，但聞鳥間關。出門曳藜杖，賴有此往還。虛名兩蝸角，自鬪觸與蠻。時平衆賢聚，君胡得長閒。會從車騎出，勒石燕然山。正恐萬里塗，高轅不容攀。

歸樂堂（案）朱子文集載歸樂堂記云：予嘗爲吏于泉之同安，而與僊游朱彥侯實同僚，卽此堂也。

百歲自逆旅，微官更周流。應知歸來樂，不減萬戶侯。淵明二縣尹，折腰憎督郵。松菊繞東籬，田園事西疇。素琴酌樽酒，稚子相獻酬。朱侯青雲士，頗復有此不。方爲功名驅，乃與賢達侔。築堂寄閒暇，笑談指林丘。焦黃問荔丹，蠔山薦新筍。嗟我實何人，市朝亦淹留。因君動佳興，擬作汗漫遊。安得二頃田，可臥百尺樓。

護國寺次前婺州韻

雙娥渺雲端。流水但空谷。尙喜雲外山。娟娟作眉綠。佳人不可見。夜半風滿竹。竹聲入清夢。野客慰孤宿。山中富蘭若。欲往寧畏獨。老僧亦知人。逢場共竿木。林芳得清心。幽澗供濯足。便可賦歸歎。簞瓢勝鼎肉。喜呂令防歸。

閒居玩編簡。蕭然罕朋儕。古士信可佳。欲語不見酬。豈如平生交。臭味能相投。別久得會面。笑談解人憂。況君復比鄰。共此一壑幽。招邀接步武。文字資討求。昨朝喜君來。快若沈疴瘳。開口四五笑。聲聲談未休。鷄鳴任風雨。時能記窮愁。因知名教地。至樂真天游。新涼動梧竹。柴門掩清秋。三徑無雜華。葑葵散金甌。年豐魚蟹熟。樽酒亦易謀。相過勿厭數。此外俱悠悠。

毛文仲惠文編

平生毛公詩。訓傳固已久。紛紜齊魯失。浪自開戶牖。至哉一言蔽。可用嚴墨守。淵源見雲仍。夢澤吞八九。雕章與棘句。錦繡間瓊玖。疑如犀始擢。粲若蚌初剖。肉食乃聞韶。晝日或見斗。三百篇未忘。七十子何有。應如摩天刃。要是修月手。時來豈無用。妙處端不朽。君看夸奪兒。在後熟顧叟。喧嗽蛩負戶。嘈囂蟬陰柳。誰令口鳴悲。正使心欲嘔。豈無熊羆士。底間牛馬走。岩曉金閨門。豪傑自先後。而君尙窮滯。履敝衿見肘。才名三十年。骯髒驚白首。我慚拜嘉賜。幼婦連蠶臼。相望百里遠。曾未共樽酒。期君頌中興。步出次山右。寄趙德莊以過去生中作弟兄爲韻七首。

悠悠功名期。苒苒歲月過。勞生閱半百。僅爾脫寒餓。山林有夷塗。此責當萬坐。閉門歌陽春。非君諒誰和。憶昨鍾山來。君亦溢浦去。今年赴溢浦。鍾山復君住。出處每相似。屢觸衆狙怒。毀譽久自定。子賢吾亦庶。士苦不自重。貪名乃忘生。向來望塵子。得車定何榮。浮雲蔽天壤。豈礙日月明。惟餘金石交。可論藏與行。築城始議戍。寓兵復言攻。二年大江南。兵戈在目中。憂時亦千慮。惟子與我同。詣闕請長纓。終軍本兒童。我初見君詩。謂世無此作。飄零三十年。文思各衰落。俱持使者節。恨別還作惡。未置白玉堂。端須著巖壑。我生少孤貧。四海兩兄弟。拊嫗賴母慈。離別幾揮涕。宦遊與夫子。中外輒相值。所恨姓氏殊。孰云情好異。處世那近名。居官敢言清。平生阿堵物。疇能字之兄。春風一杯酒。與君花下傾。窮秋動搖落。江湖渺離情。送湯朝美還金壇。

騰駒輕臥駝。野蔓欺落木。舉頭便干霄。春至亦重綠。人生百年內。萬事紛過目。得爲螻步伸。失作蠅頸縮。古來曠達士。一視等蠻觸。功名本時命。用舍豈榮辱。湯公涉南荒。歲月猶轉轂。幾年臥新州。寧肯事雞卜。身安一瓢飲。志大五車讀。竭來靈山隈。趺然慰虛谷。濯足山下泉。愛我泉上竹。相從一長笑。忍效阮生哭。胸中經濟略。欲語動驚俗。誰知天意回。歸棹如許速。春風正浩蕩。江水清可掬。海濤拍千峯。挂席下浮玉。遙欣倚門念。三徑歡僮僕。送君得無恨。我步嗟局促。要看萬里途。更試籀雲足。家山幸毋留。吾皇思陳牘。送楊安止罷信幕赴調。

後生仰前輩。今世思古人。豈重歲月久。所懷風俗淳。昔我家閩中。龜山實其鄰。出門尙羣盜。欲往志不伸。

相從朋舊間。得語盡可珍。俯仰今幾何。遺編半埃塵。白頭入幕府。始與夫子親。夫子龜山裔。麇麇見祥麟。晚同柱後史。無心問平津。典刑在眉睫。溫然異羣倫。向來簿領中。挾書聽諄諄。豈不開我塞。異聞此其真。亦或舉樽酒。笑談忘賤貧。同僚各分散。世事日以新。遙憐鄭公鄉。俎豆猶莘莘。彈冠定不苟。家庭有書紳。道學固未泯。吾謀復誰陳。尙想金馬門。西湖醉餘春。

送趙任卿蕪湖丞

青山照濡須。江駛不可渡。當年黃鬚兒。跨馬識其處。奸雄有遺跡。草木尙西顧。孤城千家邑。政爾橫故戍。翩翩佳公子。儒雅稱風度。金門向蓬萊。曾未試闊步。疇令一官卑。僅乃高尉簿。得非多言窮。定坐能詩故。相從十年間。了不見喜怒。千金第深韞。至寶可輕付。江山落君手。判斷得佳句。誰歟招得仙。我欲起謝傅。似聞王師出。鼙鼓近營駐。老生固常談。愚者亦千慮。一樽別時酒。且用慰遲暮。去去無久留。功名有夷路。送杜少卿起萃知遂寧府以高名千古重如山爲韻七首

勇兒生世間。身名要俱高。苟不得其所。富貴輕鴻毛。古來獻言士。忠嘉極變臯。尙友千載餘。斯心豈徒勞。十年天壤間。久矣聞公名。詞華少陵系。臭味修水甥。一著獬廌冠。讜論驚縱橫。九卿固美秩。不如偃專城。國朝御史府。一代名多傳。暫退或久庸。始愚亦終賢。得失安足論。俯仰歲已遷。但在愛君心。豈憂時命遷。厚味得無毒。良藥信多苦。毒留患滋生。苦過疾自愈。吾君堯舜資。事業方復古。公行幸遲遲。去國猶去魯。靈旂出江淮。犀甲下秦隴。先聲敵已寒。百戰有餘勇。手斂權貴避。膽落將士懍。誰歟任司直。用舍繫輕重。

西京蜀都望。淵雲暨相如。節誼知不足。文章焉取餘。凜然見風采。吾非斯人徒。峨峨眉山陽。不但聞三蘇。征帆轉吳楚。涉江指岷山。富貴歸故鄉。昔人以爲難。大府固可樂。高風亦難攀。豈必待政成。甘泉行賜環。清曠亭送子雲得有字

歡期苦難逢。離別乃易久。天涯老兄弟。況復親白首。田園固不足。功名亦何有。今年送兄行。正爾作太守。池陽古名郡。地控大江口。舟來武昌魚。車載桑落酒。登臨得齊山。端不負重九。公餘亦堪樂。尙有此客否。天威動江淮。狂寇行授首。努力幸馳驅。腰看印如斗。

別子雲

離觴不解醉。愁多令酒醒。別懷亦云惡。況此兄弟情。春風釀寒雨。十日未肯晴。回頭易千里。江南短長亭。次韻韓子師遊三洞過赤松

山城一雨足。水滿高下塘。好風從西來。蕭然終夕涼。變彼池間蓮。當軒洗紅粧。官事無時休。涉筆鴈鰲行。豈知青雲客。夙駕遊寶坊。坐厭市井塵。步尋松桂香。陰崖有靈湫。玉簡帝所藏。摘石收澗碧。梯空擷林芳。金盤薦麟脯。冰壺注瑤漿。更語妙道根。寶篆開函琅。路轉九曲溪。著足千仞岡。舊聞井中丹。清宵發神光。直欲餌碧霞。誰能擣玄霜。朝來得君詩。險韻句復長。使我鴻鵠心。歛爲天際翔。仙人亦舉手。笑我徒奔忙。語默付一笑。物我當兩忘。獨攜非有生。但醉無何鄉。

次韻祐父秋懷

詩人固多窮。飲水但飢臥。誰能趨權門。殘冷分涕唾。爭名與馳利。到眼不一過。居然流俗罪。我爾乃同坐。得爲荀郎弔。失作蒯生賀。卻笑貨殖翁。高談六雄破。愁來挹黃妳。悲至邀白墮。感時忽秋陰。蟋蟀正相和。

依韻恭和御製秋懷

商飈起。曙霄爽。氣靜瑤海。聖皇撫時運。喜色動眉彩。鑾旗佇西指。乘轅行北改。濤聲鼓萬壑。夜半響竽籟。漢儀欣復見。周鼎知德在。猗歟沛中歌。雲飛風正大。

次韻升之叔秋懷

客至得濁酒。共飲消百憂。涼飈颯短景。感此歲已秋。忽驚草木隕。尙喜禾黍收。九鼎豈不慕。二頃亦良謀。往聖實有言。未覺富可求。

平生八兒女而存者五人比又得女少稷作詩見寬次韻謝之

漸老思似續。撫懷良惘然。空餘歲寒心。凜凜松柏堅。平生孔明婦。貧賤房且專。生女不生男。造物甯我偏。變彼五嬌兒。弄瓦相隨肩。人言可禦盜。無乃繆以干。囊金不辦嫁。擇壻那敢全。今年又增一。比比安求旃。覺貧與覺富。可笑還可憐。向來兩重鳥。泡幻隨變遷。應門固未計。疇復與我玄。我家豈無人。文章紹編箋。退之稱其子云。固宜常有人。文章紹編箋。經心不能釋。欲語氣已填。筮言晚當見。默禱資明鑄。行年且四十。那得忽眼前。陶公謂勝無。此論吾師焉。舒宣儻可待。弓裘猶足傳。淵明詩云。弱女惟非男。慰情良勝無。則五子亦後出也。今者事方殷。煩君費詩篇。君詩妙難敵。巨刃迎小鮮。炯炯明月珠。一一照眼圓。吁嗟人

生事歲月如奔川。豈不舒我憂。熊羆夢豐年。蓬門亦何祥。但見巾帨懸。會當亦添丁。荷鋤賦歸田。老妻鼓掌笑。子意將誰愆。須知百男惡。未若一女賢。矧子四壁空。蓋頭無尺椽。兒女分所定。底用相錢鐫。尙應具扁舟。江湖窮泝沿。爲君聘絡秀。椎牛事烹煎。

明遠次韻超然談道因以謔語爲戲將無同耶

忘機亦忘言。政作口挂牌。因君強一語。習氣乃乘隙。昨夕飲君家。看朱忽成碧。醉歸城南路。不記足所歷。尙想兩紅粧。翠袖香襍積。我歌君爲舞。舉手還恨窄。詩成漫不省。歎我真惡客。臍肯來看山。未厭一水隔。

次韻子雲送兒女至昭亭見寄

巖巖昭亭山。度歲一再行。吾親在其下。有路如砥平。風物歲時佳。豈問楚與荆。胡爲不得往。使我涕泗橫。出身備王官。敢自頽家聲。聖皇察庶獄。小大必以情。哀矜且勿喜。死當使之生。念昔棲閩陬。孤童共營營。菽水曾幾何。青紫望一經。弟兄亦云幸。假節仍專城。別離乃頻有。僕奴費邀迎。安仁賦閒居。要自賢西征。板輿日歡侍。兒女森在庭。豈比隔山岳。空書問安甯。薄田可負郭。不歸定誰令。壯士志中原。邊塵暗幽并。擬躡冒頓居。端謀渭南耕。書生復何事。三入老承明。應知當饋歎。廊廟資扶傾。忍作寒蟬暗。願爲威鳳鳴。

次韻子雲種竹

官居地多隙。種竹及春早。蕭然三畝園。便可事幽討。層巒寓巖石。一目惜盡了。移根互掩映。取徑作深杳。飛來幾鳥鵲。相喚亦栖繞。微風與新月。屢舞欣嫋嫋。乃知亭館間。有竹自能好。堂前藝梅花。堂後列萱草。

叩門有俗客。未至跡已掃。遙憐敬亭下。巷僻客仍少。庭隅方解籜。相對亦社保。吟哦五字句。飲水良不飽。春雷發頭角。爾粟未應小。卜居如有得。破地出池沼。胸中千畝計。豈顧萬事擾。他年醉林間。準擬成二老。連日得雜花數株。藝之池亭。感而有作。

七十已過半。所向意不如。一官計大州。僕僕畏簡書。酒薄不可醉。歌舞見已疎。亦有淡生活。詩成自相紆。池面數尺地。荆棘試剪除。爲覓桃李花。養根待春初。日暮公事已。呼童細耘耔。稍稍淨朽壤。依依列荒墟。歲月能幾何。坐見紅綺舒。更須土脈動。藝柳分芙蕖。賞心固難事。寓目良有餘。卽此且痛飲。三年冀安居。勿言傳舍耳。吾生亦遽廬。苟無名利著。朝市均樵漁。

對梅

吏事紛俗語。新詩固難成。朝來見梅花。詩興還自生。江頭十日雨。雲色開小晴。高山帶微雪。北客眼爲明。應憐此花開。與雪猶爭衡。天公翦六出。未敵枝上英。蕭然北牕下。冰壺看斜橫。坐想南山中。晚風千樹清。平生一尊酒。肯爲桃李傾。幽香莫零落。送我扁舟行。

食田螺

幾年客勾吳。盤饌索無有。腥鹹咀彭蜺。臭腐羹石首。牛心與熊掌。夢寐不到口。竭來靈山下。空腸尙雷吼。苜蓿映朝餐。杞菊富肴餼。相過有賢士。無以侑卮酒。蹁躚樽俎間。見此青裙婦。百金買市城。競拾不論斗。枵中本離化。黝質真坤耦。稍稍被寒泉。纍纍付清滷。舒觴頗甘篆。窒戶還畏剖。茱萸摘其元。璀璨置瓦缶。

中年消渴病。快若塵赴帚。含漿與文蛤。未易較先後。吾生亦何爲。甘此味豈厚。醢之自周官。況我乃田叟。尙殊鼠供蘇。復類蝶餉柳。北風飫竹實。南俗夸針取。北人以螺作弗。吳中富家以銀針食螺。雖非綠紋酌。僅免青泥嘔。據龜定應用。噉鰕良可醜。誰能事顏色。此腹嗟敢負。詩成調兒曹。吾意真亦偶。

雲洞原注在信州西(案)此詩据廣信府志補入。

揮策度絕壑。撐空見樓臺。丹崖幾千仞。中有佛寺開。老僧如遠公。鷹門走蒿萊。下馬問所適。褰衣指崔嵬。飛闌倚石磴。曠蕩無纖埃。坐久意頗愜。爽氣生樽罍。仙棺是何人。蛻骨藏莓苔。舉酒一酌之。慨然興我懷。丹砂固未就。白鶴何時來。不如生前樂。長嘯且銜盃。

南澗甲乙稿卷二

七言古詩

跋北齊校書圖

齊文宣天保七年。詔樊遜校定羣書。供皇太子。遜與諸郡秀孝高乾和。馬敬德。許散愁。韓同寶。傅懷德。古道子。李漢子。鮑長暄。景孫。及梁州主簿王九元。水曹參軍周子深等十一人。借邢子才。魏收諸家本。共刊定祕府紕繆。于是五經諸史。殆無遺闕。此圖之所以作也。山谷所謂士大夫十二員。今范明州謂逸其半者皆是矣。至唐已隔周隋二代。不知何自得其容貌髣髴耶。高氏起北方。以兵力奮。然敦尙儒風。立石經。與鬢序。定尙書于涼風堂。質經義于春宮。意當時文士亦歆豔之。故相傳于圖畫哉。流及後裔。文林之館既興。御覽之書繼作。無愁之聲已播于天下。不揀其亡。故予感而賦之云。淳熙八年正月庚申韓某題。

高齊校讐誰作圖。一時紬書亦名儒。網羅卷軸三千餘。俗儒非真類迂愚。雌黃是正定不無。虛文末學徒區區。豈識治道通唐虞。文林高館希石渠。後來御覽嗟何書。修文偃武事益誣。轉頭鄴城已丘墟。峨冠廣袖長眉鬚。丹書寫此猶不渝。高鬢侍女曳紅裾。兩騅帕鞍立奚奴。罷琴涉筆傾酒壺。蘭臺共擬信樂歟。不

知畫手安用摹。無乃逞巧聊自娛。千年視之一歎歔。君不見文皇學士十八人。謀猷事業皆功臣。瀛洲舊圖應更真。諸君尋觀爲拂塵。

陸務觀寄著色山水屏

我居面山俯潺湲。憑軒臥牖皆見山。山光水影入懷袖。秀色爽氣非人寰。故人憐我新結屋。猶恐看山未能足。丹青寫作何許圖。不礙閉門聊縱目。千峯繚繞生白雲。小舟蕩漾橫江濱。樓臺高下出蘭若。杳渺似有鐘磬聞。坐驚巖壑環四壁。寥落高秋變春色。方壺瀛洲遠不隔。武陵桃花定誰識。君不見韋侯絕筆畫古松。黑雨白日摧虬龍。杜陵老翁三歎息。況有山木洪濤風。又不見玉堂真仙草詔罷。靜愛春山郭熙畫。文章信美身不閒。青嶂白波眼中借。我今乘間身未衰。杖藜獨步哦新詩。出門見山入見畫。佳興自喜來無時。臥龍山腰鏡湖尾。知有高齋照清泚。功名逼子未得休。歸坐玉堂應記此。

檢詳出示所賦陳季陵戶部巫山圖詩。仰窺高作歎息。彌襟范成大嘗考宋玉談朝雲事。漫稱先王時本無據。依及襄夢之命。玉爲賦。但云潁薄怒。以自持。曾不可乎。犯干後世弗察。一切溷以媒語。曹子建賦宓妃。亦感此而作此。嘲誰當解者。輒用此意。次韻和呈。以資拊掌。

瑤姬家山高插天。碧叢奇秀古未傳。向來題目經楚客。名字徑度岷峨前。是耶非耶莽誰識。喬林石廟常秋色。暮去行雨朝行雲。翠帷瑤席知何人。峽船一息且千里。五兩竿頭見幡尾。仰窺仙館至今疑。行人問訊居人指。千年遺恨何時伸。陽臺愁絕如荒村。高唐賦裏人如畫。玉色頰顏元不嫁。後來飢客眼長寒。浪

傳樂府吹復彈。此事牽連到溫洛。更憐塵機有無間。君不見天孫住在銀河澹塵間。猶作兒女語。公家春風錦瑟傍。莫爲此圖虛斷腸。

題陳季陵家巫山圖一首〔案〕此首卽前韻。疑卽所謂檢詳出示者。恐非韓元吉作。今無別本可校。姑仍其舊。

蓬萊水弱波連天。五城十二樓空傳。行人欲至風引船。不知路出巫山前。巫山仙子世莫識。十二高峯作顏色。暮去朝來雨復雲。却將幽恨感行人。江流東下幾千里。日日飢鴉噪船尾。靈帳風生醉酒漿。古廟煙青客遙指。崧高漫說甫與申。道旁況有昭君村。蛾眉妙手不能畫。枉學瑤姬夢中嫁。黃牛白馬江聲寒。昭君傳入琵琶彈。漢庭無人楚宮遠。陽臺寂寞空雲間。君家此畫來何許。照水煙鬟欲相語。要須嬌服令侍旁。不用作賦迴枯腸。

鄭仲南五梅圖

江南酒美樽不空。十年醉倒梅花中。經行所見略可譜。一一秀骨含仙風。不將鉛華污真色。亦有醉臉勻春紅。重英千葉兩何好。玉立但喜肌微豐。紅綃金縷變新樣。品異獨許天香同。花開到處卽吾圃。水寒月淡煙空濛。醉來踏雪更起舞。長歌目送南飛鴻。自後春歸厭寂寞。坐覺桃李難爲容。忽驚橫軸入吾手。世上猶有丹青工。扶疏清影臥空碧。一笑似喜曾相逢。君家亭館安用此。此物自昔添詩窮。詩成妙手儻不惜。畫我曳杖穿芳叢。

龜峯行

吾聞靈龜不願死，有用于清廟。但願曳尾安泥塗，所以漆園吏坐歎。清江使者逢豫且，龜峯之龜定何物。不在泥塗之下，乃在萬仞之上，高突兀，是耶非耶，遠莫測。安然不動，藏其穴。伊昔帝堯有聖德，此龜無乃負圖出，圖成授帝，埋其骨。猶使琢石志之存，髣髴又疑神禹碑，刊在衡山巔。碑高上與日月並，此猶其跌棄不取，神鬼守護踰千年。我欲詰其端，此事恍惚無迹。往往皆在太古前，斗中神人被髮立，蜿蜒佐之從。汝蟄九陰司，存常在此。今汝巢南失其職，又聞巢縣事頗以伊尹生空桑，母嫗避水欲徙去，待汝兩眼生赤光。遂令萬室之邑，化作魚與鱉。汝乃遁走至此藏，上天震威趣汝壽，使汝扶服死且僵。醜形質磔在石笥上，不可以鑽，不可以灼，不可以擗。奈何猶復不自斂，荒崖斷壑反以名字彰。因思支祁鎖頸泗水中，帝以巨鎮岌峨壓其宮。名之以山，不以峯，豈有形狀與此同。吁嗟此山氣象繁礪，亦雄偉奇峯羅列三十二。或如威鳳昂其喙，或如俊貓立且戲。石鍾孤撐危欲墜，展樓矗起見天外。大眺么麼不足記，神旗鐵壁非一類。何用獨取汝之名字，豈汝黠且庸。鼓妖街怪百里內，使汝生存跌宕安可制。我初信汝靈，今復知汝凶。江湖波濤洶湧，不一濡汝足。雲霧呼噏陰晴變態，猶無窮。不知造物安用此，徒以動蕩耳目夸兒童。何時巨靈引手擲汝八荒外，舉頭直見天穹窿。

永豐行

丹陽湖中好風色，晴日波光漾南北。湖岸人家榆柳行，風颭低昂似迎客。繫船並岸聊一呼，老農指是官

田圩長衫紫領數百輩。見我羅拜長嗟吁。政和回頭五十載。官長築圩宛然在。東西相望五百圩。有利由來得無害。官圩民圩奚所拘。此地無田但有湖。圍湖作田事應爾。底用徹地還龜魚。民圩不堅自招水。水潦何常鎮如此。官圩六十里如城。削平爲湖定何里。請看今來禾上場。七百頃地雲堆黃。縣官糴米三萬斛。度僧給牒能商量。我聞此語汗生面。千聞豈如一見。吾君神聖坐九重。輕易獻言誰復辨。卻憶吳中初夏時。舂鋤去決田湖圍。雞驚上籬犬上屋。水至不得攜妻兒。無田赴水均一死。善政養民那得爾。寄言父老且深耕。爲汝馳書報天子。

建德道中

風雨回頭已十日。野花狼籍春可惜。水深泥滑行路難。但見千山好顏色。青青稻畦初布秧。人家掩扇蠶事忙。駕言有程不可駐。鷓鴣一聲歸夢長。

桐柏觀三井龍潭下爲瀑布

一水赴壑如奔雷。兩山壁立堅誰開。山高石限水不去。萬古鬪怒何轟豗。盤渦散作鍾與釜。往往石上相縈迴。泓渟歲久深莫測。人言海眼良可猜。不知蛟龍底無用。局促石竇真窮哉。未能九土霑一雨。尙與千里清炎埃。往時金蚪墜玉簡。中使奉詔從天來。百年舊事今寂寞。但有雪浪飛崔嵬。杜鵑花開蘭正發。雙闕萬丈晴雲堆。寒聲徹耳心骨爽。凌風一上吹笙臺。

玩鞭亭

黃鬚鮮卑勇無策。自馳駿馬來窺賊。賊奴但怪日繞營。起看飛塵已無跡。寶鞭不惜棄道傍。坐令老嫗知興亡。百年社稷有天意。奸鋒逆焰徒鴟張。孤城遺跡森在目。平湖無波春草綠。卻對青山憶謝公。公老猶嫌人姓木。邊兵已重朝土輕。中原有路何由行。柙中虎兇不可制。江左夷吾浪得名。

魯公堂

魯公之節非一死。其誰碑之子曾子。魯公之德人未知。其誰堂之張紫微。繼公作郡五百載。登堂思公宛如在。江南遺墨處處傳。魯公去作麻姑仙。一杯相與借風月。但見雲碧開池蓮。紫微聲名今第一。歸上鸞臺應不日。笑談千里無兵戎。臨川草木生春風。他年道傍兒女說。不思魯公思張公。

歸耕堂

退之手板愧丞相。淵明束帶羞督郵。紛紛雀鼠待一飽。豈若植杖耘西疇。劉郎大耳最叵信。剛道田園不可求。摩挲腴肉事鞍馬。堅臥百尺營高樓。安知南陽扶耒手。談笑爲君分九州。我來龜溪二三載。此策未辦誠淹留。喜君負郭有餘地。百金賣劍歸換牛。樹頭布穀曉相應。築室坐占林塘幽。詩成使我佳興動。叩角便作商聲謳。他年釜甑得長滿。區區肯顧監河侯。

李編修器之惠詩卷

塵埃僕僕日走趨。胸中倒懸一字無。迫人簿領推不去。眼明忽見千驪珠。矍然驚呼此詩歟。如醒乍解病獲蘇。歸來明燭喜無寐。手不忍釋自卷舒。語新格健意有餘。風骨峭硬中含腴。猛如橫陣舞刀槩。清若雅

宴調笙竽。我窮已極。君益迂。學此似費千金屠。前有太白後長吉。君家詩名宜復初。明明天子開石渠。歎我短後追長裾。時平合第從臣頌。請君早上承明廬。

少稷勸飲每作色明遠忽拂袖去戲呈

無多酌我蓋司隸。不能滿觴田將軍。坐中幸免沐猴舞。且復周旋非貴人。人言勸飲無惡意。君胡作惡使客起。少陵亦遭田父肘。況我忘形友君子。從今勿勸亦勿辭。我欲眠時君自歸。先生一斗一石醉。莫問喧爭與嘲戲。

戲韓子師

讀書堂前霜月明。讀書堂後霜風聲。主人讀書已萬卷。足踏省戶還專城。竭來掩關臥不出。左擁韋編右瑤瑟。似聞天女亦愛靜。使喜蘭房長英物。我舍應門纔一兒。趙子尤作仙果遲。白頭相看輒浩歎。玉樹獨滿君家墀。我歌聲長君且聽。不特交遊幸同姓。極知玉盎有新醅。每恨金觴乃無柄。事見趙子從君泥飲不作難。景物過清天復寒。犀錢湯餅未免俗。琵琶與箏當合彈。

戲贈范元卿

憶昔茗溪醉中語。屈指淒涼十寒暑。紛紜世事去如雲。兩鬢蒼蒼各如許。春風學省數會面。抗袂吁嗟走塵土。我慚屢戰不能奇。袖手歸來仆旗鼓。喜君射策有新功。雙鵠聯翩仍一舉。胡爲不上金馬門。簿領卑棲猶隍伍。風前未厭鷓鴣敵。筆下懸玄鳳凰吐。閩山千里要佳句。應弔雙龍一懷古。元戎好士見此客。定

肅弓刀按歌舞。素英丹荔雖已過。海珍正可羅樽俎。鷓鴣勾舟木葉墮。秋晚上寒更風雨。請君彊飯趣歸程。莫爲梅花思羈旅。

次韻沈信臣遊龍焙

武夷仙人厭塵埃。金鞭白馬飛崔嵬。丹砂已就不可識。尚有瑤草分靈栽。千花剪巧綴密露。秀色不待春風催。東溪路入三十里。山如舞鳳連翩來。槍旗未動供採掇。壘鼓夜作空山雷。蒼虬繞圭龍護壁。面爲鐵石口瓊瑰。烹煎闌水出好事。珠璣玉宇相縈迴。已嗟雙井甘退步。況復日注真難儕。我來竊食端爲此。把玩一日三徘徊。手斟清泉弔陸子。底用濁酒窮歡咍。頭風快愈春睡散。老眼尙爲羣書開。知君此遊更不惡。坐有纖纖時捧杯。杜牧之詩。茗盃纖纖捧。信臣載後乘以遊。故云。

重九日中甫子雲二兄會別龍山

秋風作霜楓葉丹。扁舟未發龍山灣。山頭窳堵半天出。十年笑我幾往還。今年結束值重九。愛此山水照高寒。親朋話別情總厚。兄弟白首仍蒼顏。相留一笑不易得。爭挈美酒羅盤餐。登高正爾在高許。下視擾擾眞塵寰。追思姑孰有故事。雅宴亦復同此山。雖云小異得佳客。主人鬚蜩懷胸紆。滄波至今洗遺恨。豈若我輩同清歡。是時郊原新雨足。歷歷煙樹明江干。放懷自知人境異。極目頓覺天宇寬。惜無五絃寄妙手。已有征雁橫雲端。南飛休論九萬里。東游更渡五百灘。明宵酒醒會相憶。夢繞百級憑飛欄。

送朱元晦

前年恨君不肯來今年惜君不肯住朝廷多事四十年愚智由來各千慮君來正值求言日三策直前真
諫疏詆訶百事推聖學請復國讎施一怒天高聽遠語不酬袖手翩然尋故步我知君是諫諍才主上聰
明得無悞一紙底用教鶚冠百戰應當啓戎輅江山千里正風雪歲月崢嶸條將暮有田可耕屋蓋頭君
計未疎吾亦去君歸爲謝武夷君白馬搖鞭定何處

送許侍郎知宣州

我公名滿東西川一持使節幾十年橋經萬里坂九折兒童學語知公賢上皇詔下嗟見晚歸來荷橐趨
甘泉平生所學欲盡試新語僅奏囊中篇公獻所著書太上皇稱善兩淮破碎賴整理百工蠱敝資鑄鑄
念公雖老猷自壯何謂宜去請益堅玉音三諭不可挽一麾且復臨江壖宣城景物今更妍木瓜如瓠栗
如拳敬亭山下躡遊屐疊嶂樓中呼酒船謝公已往詩句在公有妙語真齊肩卻招李白弔杜牧收攬風
月酬雲煙中原未復敵未滅政成請公須著鞭吾君有意詢黃髮廟堂之謀當萬全

送蘇季真赴湖北憲司屬官

憶昔聞君未相識春雨繫船吳市側逆風白浪不成行坐聽親朋談歷歷豈意飄零晚相見俱捧江東從
事檄拙鳩未省厭榆枌威鳳誰令安枳棘今年喜君若有遇去我還爲遠行役一樽忍話故園事童穉吁
嗟髮今白君家聲名塞宇宙翰墨縱橫富奇策未容世職踐明光聊佐輜車司郡國衡山洞庭忽在眼禹
牒黃車有遺跡詩成不用弔靈均爲訪桃花招隱客

偶得佳酒懷尹少稷聞其連日致齋在臺作長句寄之

孔君一月二十九日醉太常。一年三百五十九日齋。人生百歲駒過隙。直與外物勢形骸。君非太常何用爾。監祭有令時當差。朝廷禮備百神秩。不比媚奧猶燔柴。念君幾日得閒暇。歸昨壓飢妻奴哇。重門咫尺不得見。使我有酒空相懷。憶昔過從水南寺。風廊雪屋靡不偕。靈山懷玉了在眼。蒼翠突兀石荀鐵柱如籤排。醉來起舞對山水。狂歌亦和襄陽渾。一時取樂未云足。後會回首何其乖。今者相逢號朝士。僕僕聽鼓趨天街。欲觀禮樂問文物。但見鞀鼓鳴江淮。喜君頭上冠作鴈。文筆愈健詩愈佳。青雲萬里要直氣。幸勿觸狐當觸豺。我今勃率百僚後。自覺迂鈍難爲儕。一杯耳熱不共醉。夜長獨坐燒寒褶。隔牖降將新授節。絲竹間響駢金釵。時逢富貴雖可羨。擾擾得失真蠅蝸。江山到處有佳趣。故應赤烏輸青鞵。明年春風我欲賦歸去。佇君功成作頌磨蒼崖。

方務德元夕不張燈留飲賞梅務觀索賦古風

昨日風雨今日晴。綠水橋南春水生。使君元夕罷高宴。亭午邀客花間行。危亭直上花幾許。水仙夾徑梅縱橫。不須沈水薰畫戟。簾幕自有香風清。門前紛紛鴻鵠亂。隱几坐愛寒江明。憶昨淮南戎馬動。豈謂景物還新正。遺民歸公十萬口。鞀鼓日日嚴刀兵。眼看指麾盡摩撫。閭里愁歎成歡聲。酬功端合待玉輦。安得坐嘯江干城。景龍燈火公尙記。蒼舊出語兒童驚。我來兩月濫賓客。況有別駕能詩名。相從一笑說萬事。重費美酒勤杯觥。東風搖蕩入煙柳。歌管錯雜催離情。詔書徵拜那可後。爲公前馬遙相迎。

次韻少稷梅花

君不見江城梅花春欲動，剪冰仙人作花供。客來酒盡甘啜醺，常恨公田無秔種。雪晴梅蘂更可愛，百匝來看地猶凍。杖藜一笑答春風，豈必鳴鸞與歌鳳。幽香要自己心清，冷艷不禁還目送。興來往往得佳句，落紙揮毫字尤縱。卻驚車陣有勍敵，旋結趙叟盟衡雍。孤芳未省須刻畫，百卉應先厭嘲弄。我如蟋蟀鳴苦遲，君似驕驄驟難控。相如上林晚奏雅，靈均喜橘工記諷。不妨聊繼廣平公，東閣疎枝與君共。

士人池中有新荷戴錢而出者少稷明遠相率賦詩戲作長句

君不見紫髯將軍射無敵，志目中眉猶動色。晚年驚見賣油翁，一線穿錢曾不失。人言手熟會當爾，世事由來真一劇。紛紛刻楮技已窮，厭看人力須天工。湘妃撫掌漢女笑，爲我試手馮夷宮。芙渠生葉不自展，胡爲正在阿堵中。青銅翠羽光相映，莫遣游魚動荷柄。芳心滿眼誰得知，坐使詩人發嘲詠。我言羞澁囊久空，井中飛蚨那得逢。不如青鴨爲銜去，贖買明月酬清風。

觀蓮

廣寒仙子衣作裳，夜從宓妃款英皇。朝游洛浦暮瀟湘，紅粧翠羽森成行。仙姿不作時世妝，或疑朝霞豔秋霜。臨流顧影濯滄浪，游魚屬玉雙鴛鴦。長庚北斗相低昂，笑中如花語如香。徘徊醉著清漏長，炯然開奩照湖光。湖風吹水洒面涼，明珠落佩千鳴璫。碧甯宛宛中可觴，爲君行歌酌天漿。瑤池玉井遙相望，歸舟浮空月茫茫。

同尹少稷賦巖桂

江南秋盡猶無菊。只有幽香滿巖谷。紛紛千樹散黃金。翠葉離披剪寒玉。繁枝疑從缺月墮。嫩葉不受微風觸。芳枝冷淡誰與妍。霧雨陰晴自膏沐。不妨松竹共行伍。要使芝蘭盡臣僕。小山有句嗟未盡。騷經已斷誰能續。每至凋零足惆悵。尙喜爐薰駐餘馥。爲君掃地斗量歸。猶勝胡椒夸百斛。

隆興甲申歲閏月游焦山〔案〕此詩据鎮江府志補入。

荒村日晴雪猶積。繫纜焦公山下石。江翻斷崖石破碎。瘞鶴千年有遺跡。瘦藤百級躋上方。浮玉南北江中央。檣竿如林出煙浦。酒船遠與帆低昂。老鷗盤風舞江面。殺氣淮南望中見。神龍只合水底眠。爲洗乾坤起雷電。觀音巖前竹十尋。大士不死知此心。醉歸更喚般七七。賸種好花開鶴林。

南澗甲乙稿卷三

五言律詩

南劍道中甲子年作

喚渡春潭側。堤彎踏曉晴。回舟動山影。映日見魚行。墅遠孤煙出。江深白鷺明。塵勞消底計。對此覺身輕。

步月

山靜水逾響。我行清夜中。月華霜著地。雲影浪搖空。有酒不惜醉。無人誰與同。嫦娥搗仙藥。應厭廣寒宮。

端午日張園分題

輦路逢端午。今年始賜休。不知人世暑。還有水軒秋。花氣晴薰坐。湖光晚逼舟。明朝又奔走。贖作片時留。

秋日雜詠六首

客少無塵語。官閒省吏文。醉眠千幃日。危坐一牕雲。酒戶時通籍。詩壇漸策勳。平生不龜手。郢客渾揮斤。草草重陽節。黃花惜未開。故人猶有酒。行客且銜盃。日落蛩聲苦。雲低雁影來。南山足佳氣。獨立意徘徊。醉著山堂夢。初涼枕簟清。秋聲迷夜雨。月色誤天明。爲客心長慣。思親意未平。歲華容易晚。寂寞壯心驚。古郡青山合。乘高眼倍寬。風驚梧葉陣。雨暗菊花團。涼色宜欹枕。秋光怯凭欄。向來疎懶意。景物暫相歡。

怪底西風別。秋香一夜繁。攢金差可擬。揉蠟巧能搗。買地宜多種。移牀且細看。江南籬菊晚。賴爾慰愁端。
絕壁跨城樓。連天海氣浮。長空去鳥盡。落日斷雲留。鼓角深秋壯。山河薄暮愁。勞生知底所。倚杖寄滄洲。
聽雨

昨夜燈花暗。今晨雨意深。殘花惟有葉。新笋已成林。未辦扶頭飲。聊爲擁鼻吟。興闌幽夢斷。簷際足清音。
豐樂樓

今歲西湖上。經行始此迴。輕煙認花柳。細雨識樓臺。春半已多日。官閒能自來。情知欠樽酒。倚杖且徘徊。
清明

老去驚時節。春來念物華。青煙百六日。同社兩三家。醉著凌風舸。歌成滿路花。滄江萬里意。獨立送殘霞。
閒居遣興

著雨柔桑暗。吹風小麥齊。江深涵日淨。野闊並雲低。車馬能相間。琴書故可攜。村村花自好。不奈子規啼。
道中遇停郊祀詔書

丹詔西來急。沿淮次第知。應嗟饗帝日。卻作視師期。士苦二年戍。人懷四郡悲。平戎可無策。帷幄定誰咨。
建業書事

千載西州路。何人不此行。山橫桃葉渡。江動石頭城。天闕雲端聳。秦淮雨後清。敢論風景異。舉目笑平生。
過芙蓉對鏡嶺

世事日千變。勞生憂患多。誰知度炎熱。正爾陟嵯峨。峰矗蓮初綻。崖枯鏡未磨。江東茲絕險。歎我兩經過。

慈雲嶺

極目慈雲路。看山立少時。湖光經雨闊。柳色泥煙垂。琢石觀蹲獸。鐫崖讀斷碑。西關知底險。撫掌笑兒嬉。

山行

意適都忘遠。行歌未覺勞。崎嶇一徑入。上下數峰高。嫩白憐新菊。輕紅訝小桃。得桃花數枝。歸來情興動。風葉亂蕭騷。

秋盡暑猶劇。今朝涼意新。輕陰能障日。小雨不生塵。度壑時投策。看雲一岸巾。鄰僧問何往。苔果愧情親。

登玉京洞遇雨

俗物祇散意。市朝那復情。未能蓬島去。且上玉京行。古洞深無底。幽泉細有聲。山靈知我意。贍乞片時晴。

雨中同鄭德飯白雲菴

小雨不成雪。凍雲猶沒山。若無官事縛。聊傍野僧閒。濁酒間何闊。清遊阻且艱。相看成冷淡。得句不空還。

龍華寺傳大士真身像

古寺郊丘側。鍾魚曉未喧。雙林有遺骨。瑞萼記名園。粒石嗟餘飯。神槌想叩門。蠶桑猶有謁。鼓舞動山村。

青陽龍池山潮泉其應有時禱于泉上坐頃三應山人以爲未有也

八月錢塘岸。江湖畫般雷。豈知驚浪涌。不轉此峯來。古竇深無際。神淵秘莫開。山靈如愛我。三送雪成堆。

寄題尹少稷借竹軒

借屋復借竹。主人貧可知。清風時引酒。長日最須棋。牆缺秋聲過。庭空月影隨。遙憐對高節。幽獨更題詩。

龔敦頤芥隱詩

萬古須彌頂。嘗于芥子看。憐君作書窟。喚客築詩壇。默識眼界淨。忘憂心地寬。老來同此味。廣廈任高寒。

僧仲儼芥室

設席纔方丈。誰將芥子看。須彌藏自穩。琥珀拾應難。脚底芒鞋破。顙邊衲被寒。遙知八萬座。一笑且團圞。

易安齋

紫陌猶千里。禪房自一家。翠深穿小徑。紅濕動迷花。絡石寒梢亂。欹巖碧幹斜。春江夜來雨。如爲洗煙霞。

過松江寄務觀五首

四海習鑿齒。雲間陸士龍。酒狂須一石。文好自三冬。風水客愁遠。煙花春事濃。還將枕流耳。來聽景陽鐘。

風浪白如屋。垂虹煙靄間。清心太湖水。滿眼洞庭山。放鶴迎人舞。飛鷗伴我閒。是中有佳句。詩思未容慳。

一別未十日。舉頭楊柳黃。蜂來知酒美。梅度覺船香。岸幘春容好。翻書晝景長。無人共談麈。自酌引壺觴。

湖岸見亭館。誰家長鎖門。主人甯好事。淥水但名園。借我安茅屋。容君共酒樽。風波正奔走。獨立望江村。

並舍盡垂柳。出簷多好花。獨尋江岸路。靜愛野人家。水暖分魚子。沙晴蹙荻芽。放歌吾亦醉。漁戶卽生涯。

寄趙德莊二首

報陟西樞椽。遙憐勢未行。葬親嘗有請。去國豈無名。松菊關心在。江山到眼青。琵琶洲畔宅。歸計幾時成。早辱交情厚。年來事輒同。自知榮宦拙。甘爲好詩窮。鳬鴈且依水。馬牛還信風。故應懷李白。但欲老江東。

送子雲五首

四海雙兄弟。南來幾別離。未成春草夢。先動白雲思。涕淚三年隔。風塵數月期。生涯奔走裏。卜築定何時。薄宦何堪遠。兄今奉板輿。貓頭供美筍。玉板薦嘉魚。川陸徐行李。喧寒慎起居。會因回雁足。時一問何如。楚國富山水。衡湘千里餘。人皆思太傅。我獨念三閭。貧賤眞勞矣。功名果命歟。官閒道林寺。洗眼臥看書。別意能淒楚。驪駒且緩聽。百年三過一。萬事醉還醒。策馬身猶健。看山眼倍青。東風有底憾。吹柳暗長亭。水闊湖南道。春深可當遊。鳥聲喧綠樹。花影趁行舟。短袖那容舞。良疇不易謀。有親垂白髮。斂板未應羞。

送漳赴分甯尉

挾筴度春水。絮飛花易闌。吾衰聊玩世。子壯且勤官。雨後半篙綠。風生孤棹寒。殷懃酌雙井。爲試茗芽看。

送溫伯玉二首

楚尾還重九。荒園菊半花。因君向姑孰。使我墜烏紗。更度千秋嶺。休尋萬里沙。壯年豪氣在。途路莫興嗟。牛渚青山路。衰遲舊往來。西風動黃葉。朔雪記寒梅。戍鼓邊城近。樓船猛士催。然犀不用照。拔劍憶澹臺。

送張仲良二首

客裏親朋別。詩成倍黯然。春風動花柳。歸路繞雲煙。共絕過門盜。子與仲夏俱六女子。俱無使鬼錢。生涯知底許。消息幸頻傳。

氣概青雲上。聲華碧海邊。交遊俱得譽。伯仲總能賢。幕府甯淹薄。諸公肯薦延。功名第遲速。強飯且加鞭。

送梁士衡歸餘杭

一水分他縣。音書近可傳。飄零俱北客。憔悴各中年。破屋春風裏。扁舟夜雪前。故人逢短簿。秀實作簿。爲話意茫然。

古寺荒山曲。相過日自宜。插花狂墮幘。折屐醉爭碁。世事關情懶。風光逐意移。歲寒冰斷港。君去復何之。

送諒弟丞邵陽

春水生南澗。吾衰久索居。三年還作別。數字且頻書。文史差無負。田園慨未餘。常存愛民意。門戶有權輿。

送中甫兄之淮南

憶昔湖陰道。邊聲日夜聞。遠峰明積雪。疊鼓墮層雲。未歎河山異。常憂玉石焚。三年真一夢。相見且論文。
老惜親朋別。貧知客寓愁。青燈耿遙夜。濁酒對窮秋。寒日催征騎。新霜倚縣樓。因君問淝水。莫渡北來舟。
流赴貴池簿

四十纔生子。今年亦効官。國恩期共報。世路覺尤難。簿領猶應暇。詩書且細觀。傳家門戶立。卽此慰衰殘。
次韻子雲春日見懷二首

每惜春光去。生憎鷓鴣鳴。倦遊心易賞。多病戍仍更。風雨山花過。池塘野水生。買牛歸間舍。此計會應成。
山寺鶯花裏。懸知載酒行。青春隨夢斷。白髮伴愁生。爛醉真吾事。亡機豈世情。書來得佳句。雙眼暫增明。

次韻張晉彥書事

頤利何時縛。康居久未灰。天威如自震。敵勢不難摧。日月丹心在。風塵白眼開。受降城旋築。且緩羽書來。

次韻任信儒見過

鬬雀嗟窮巷。鳴鷗枉故人。塵埃生破甕。風雨墊烏巾。別久情逾厚。詩來語更新。囊空得珠玉。此段不全貧。

次韻趙任卿至北苑二首

行樂須春事。微官日自忙。輕雲弄天色。細雨出風光。筠甲連山破。林髯夾道蒼。擬尋花鳥去。更待茗芽香。
好雨驚連夜。疎鐘喜報晨。池心春漲綠。花面曉粧勻。野渡經年別。官茶幾焙新。風光爲傳語。何事曲江濱。

次韻魯如暉雪晴

臘近千門雪。風高一夜晴。醉餘和被擁。夢破覺牕明。鼙鼓三年戍。關河萬里情。應憐鐵甲冷。烽火未須驚。

次韻金元鼎新年七十

七十古稀有。君今還倦游。危機直虎口。薄利祇蠅頭。黃髮宜登用。清時忍退休。遙知江上宅。聊近水邊鷗。
論文傾滿座。嗜酒見天真。舊懷李君馭。今懷王翰鄰。歡情知老大。詩話倍清新。莫作懸車念。滔滔且問津。

葉少保挽詞六首

奧學餘家法。宏材邁古風。劇煩樽俎上。禦侮笑談中。勳業中興殿。規模大駕宮。公造建業行宮。考周漢制度甚備。哀聞父老泣。遺愛六州同。

望實諸公右。文章百代師。匡時存詔令。謀國見丞疑。易識悲麟意。難追吐鳳辭。公傳春秋周易未畢。門生滿天下。誰繼蔡邕碑。伯喈作橋公碑。

宦達平生早。高年及引歸。安車榮絳節。黃髮遽衰衣。未致生芻奠。俄驚薤露晞。孝心天地惻。相望兩靈幃。精舍湖山外。天開萬石林。五車娛晚歲。一壑遂初心。激水穿巖竇。栽花繞澗陰。佳名端不朽。揮淚記登臨。翰墨通家舊。吁嗟大父時。追隨千里駕。酬唱百篇詩。小器慚非遠。孤童誤見奇。慇懃授簡意。敢負昔年期。公在閩中作萬象亭某爲之賦。

憶罷儀曹試。登門語更親。故懷如昨日。一醉賞餘春。佳句猶霑墨。遺編竟掩塵。公欲序高祖文集。煙雲變朝暮。感慨獨傷神。

故資政殿大學士樞密洪公挽詞二首

世學推東楚。文名冠異科。弟兄聯玉笋。父子擅金坡。籌幄淵謀在。陪京惠愛多。無因奠雞酒。清淚灑江波。甲第湖山美。人知小隱名。天方開樂土。地忽起佳城。祕殿疏殊渥。珍臺錫異榮。勳勞纔右府。曾未陟魁衡。故贈太師丞相文恭陳公挽詞三首

拱揖消狂寇。從容奉兩宮。臨危幾謝傅。忍事實婁公。陶冶無偏黨。經綸盡樸忠。再來金鼎地。高臥亦成功。

扶疾祗嚴詔。邦基整屢危。紫宸朝奏事。黃閣暮興悲。德望儀千載。恩榮冠一時。石龜山下路。誰爲記豐碑。
凜凜循良吏。休休一介臣。投艱推字量。禦侮賴精神。給侍恩雖渥。懷歸志莫伸。平泉開甲第。花木未經春。
故太師和王挽詩三首

宿衛登環尹。榮恩四十春。威名傳瀚海。功烈上麒麟。卻敵凝山岳。臨機妙鬼神。中興奉朝請。勞舊總無人。
淮右偏師出。江津督府開。橐臬賊陣蹙。瓜步敵鋒摧。寶劍疇能舉。神旗悵莫回。悲風若水路。千載有餘哀。
甲第神京冠。王封異姓優。風雲開傑閣。水月轉芳洲。種玉階庭盛。揮金族緒周。諸郎自持橐。袞袞尙公侯。
致政龍圖給事吳公挽詞二首

風采儀三院。循良著六州。譽高青瑣闥。名動紫雲樓。經世餘閑議。興邦闕遠猷。君王問黃髮。柱石可能留。
勇退湖山地。心期白傅論。仙風占蒼嶺。樂土並桃源。壯節傳交舊。儒科付子孫。脩齡纔八十。殄瘁只聲吞。
致政龍圖給事徐公挽詞二首

磊落南州士。家聲二百年。失身幾利吻。得路已華顛。青瑣元虛位。黃扉久佇賢。上欲大用公而不起。九原
甯可作東望。益潛然。

今代詢黃髮。臨雍缺盛儀。久從曾釜樂。俄重鯉庭悲。德履嗟如在。功名誤見期。平生挂頤劍。聊掛墓門枝。
葉夢錫丞相挽詞二首

製邑騰嘉譽。升平遂一州。雍容持從橐。慷慨動宸旒。相業看調鼎。兵機久運籌。勳庸元未究。湖海淚空流。

味道蘇仙井。言歸鬢尚青。僅周新甲子。還仰舊儀刑。祕殿欣疏寵。華鐘待勒銘。追隨樽酒地。愁絕最高亭。

挽任諫議詞二首

身致高門重。心無閭室欺。臧孫宜有後。伯道乃無兒。公無子以族子後千載君如此。流年疾若斯。寧無百
人贖。遂作九原悲。

故端明尚書汪公挽詞二首

凛凛諍臣節。恂恂循吏名。世嗟陽諫議。人憶謝宣城。優詔纔三接。嘉言未一行。清霜數行淚。豈爲故人傾。
未冠登華選。高文動漢廷。持身嚴築席。慮世炳丹青。庶府咨沿革。諸儒見典型。空嗟廊廟略。不上鼎彝銘。
獻納高門地。君王識履聲。閩山歌惠政。蜀道懽威名。逝矣嗟天命。誰歟總國成。弟兄無六十。殄瘁亦堪驚。

致政許侍郎挽詞二首

海內循良政。高名實吏師。銅符嘗五換。玉節更三持。慷慨平戎策。雍容聖德詩。公嘗獻十一說及詩百韻。
太上歎賞。甘泉僅持橐。功不負明時。

蜀道煩司馬。宣城屈謝公。風行萬里外。身老十年中。厚德今疇繼。深知昔誤蒙。佳城閱千載。雞酒恨何窮。

故宮使待制侍郎陳公挽詞二首

政譽京江口。威名峴首山。折衝章貢外。制勝漢淮間。零落金閨彥。淒涼玉笋班。文章與功業。未老竟長閒。
結綬同郎省。幽居願卜鄰。櫻寧良自適。坎壤遂無伸。壯志嗟猶在。交情晚更親。秋風敬亭路。西望一霑巾。

故宮使參政觀文錢公挽詞二首

忠孝全家法。清修極道腴。雍容調庶政。談笑靖邊隅。許國心猶壯。安時貌不枯。脩齡纔七十。誰爲隔黃壚。
甲第依香火。棲心不離禪。頤神雖綠野。紀績自凌煙。榮觀丹丘外。真遊弱水邊。佳城近劉阮。覺路有飛仙。
故致政參政大資張公挽詞三首

海內推耆德。朝端薦直聲。金輝餘烈火。玉價自連城。正色消羣枉。高風聳後生。君王問黃髮。猶僅陟台衡。
益部煩分陝。金陵起御戎。逢時身已病。憂國志彌忠。廊廟訐謖外。丘園夢寐中。彈冠與歸老。盛節有初終。
憶荷公車薦。多慚識面求。驚心異生死。倒指十春秋。國士懷青眼。門生慨白頭。東芻催老淚。東與大江流。
挽曾伯充大夫詞二首

作吏餘家法。臨民有古風。政推平易外。人在典型中。道擬莊生合。公留意黃老。年幾衛武同。清時記者舊。
揮淚楚江東。

宦達雖無意。安榮自一門。剖符看令子。曳綬及諸孫。盛德清難繼。高風俗爲敦。葬車駢百兩。歸臥九華根。
方務德侍郎挽詞二首

壯歲分符節。飛騰四十春。吁嗟循吏傳。無復老成人。三輔勤勞舊。西清寵數新。青山問何許。猶與謝公鄰。
上聖詢黃髮。清時慨莫留。居中二千石。典外十三州。禁闥多閑議。籌幃裕遠猷。交親半天下。注海淚空流。
周元特詹事挽詞二首

道學尊閭里。衣冠見偉人。鷄羣真野鶴。鷹角目祥麟。讜論追前輩。清時識諍臣。他年激貪懦。風動霽溪濱。
黃髮趨嚴詔。青官啓太微。圃公方入侍。疏傳已言歸。奏牘三千在。流年七十稀。無從奠鷄酒。老疾只沾衣。
挽徐敦濟郎中詞二首

南渡推人物。彝常有世家。州麾三上最。使節五分華。通籍恩初渥。登車病已加。甘泉垂入侍。華屋漫興嗟。
強學三冬足。高談四座傾。書成唐北海。文似漢西京。籌幄嘗裨畫。星曹僅掛名。生芻纔一束。聊寄淚縱橫。
挽傅安道郎中詞二首

節槩存先烈。文才藹儔聲。弟兄聯鷹仕。父子擅英名。密勿棲郎省。光華擁使旌。甘泉虛徙橐。曾未席恩榮。
蚤負凌雲氣。長懷流水音。詞場俱白首。世路只丹心。妙語空成誦。懽盟詎可尋。泉山幾千里。涕淚但霑襟。
范泉州挽詞二首

淡墨標名早。飛騰僅石渠。學傳外家蘊。論合古人餘。議本楓宸疏。評和相第書。忠言與危行。青史未應虛。
玉節江南道。銅符海上州。登車人自化。截鑿士爭留。不作田園計。長懷世事憂。秋風閉黃壤。誰爲子孫謀。
挽張元幹國錄詞二首

左學馳聲舊。中朝得錄初。宏材知底用。壯志亦成虛。歸旄三千遠。親年八十餘。蒼天誰與問。行路亦欷歔。
一第固已晚。九遷人共期。功名雖有命。壽考獨無時。門士韜珪壁。諸郎襲禮詩。他年振儒學。猶慰九原悲。
尹少稷挽詞二首

蚤擅奇童譽。中蜚處士聲。談鋒粲開闔。筆力妙縱橫。主聖由言悟。官清以諫名。故交零落盡。老淚與河傾。今代賢良策。中興未一陳。文章如漢士。家世亦齊人。遇合嗟云晚。忠嘉慨莫伸。朔風吹墓草。毀譽付千春。

毛平仲挽詞二首

輿學窮千古。奇文擅兩都。功名一盃酒。身世五車書。未奏揚雄賦。長懷仲舉輿。溪塘巖下水。豈羨石爲渠。蚤歲聞嘉譽。論交鬢已絲。長言雖面隔。千里但心期。故壘生芻糗。塵編幼婦辭。倚天長劍在。欲掛漫興悲。

宋傳道挽詞二首

德履無遺恨。絃歌有去思。養親三釜樂。作郡十年遲。壯志沈黃壤。英遊閉赤墀。豐碑頌遺愛。誰爲繼羅池。留落東州彥。相期幸卜鄰。筒詩餘唱永。樽酒記情親。舊國歸無日。諸鄉見有人。佳城千載恨。雪涕楚江濱。

故秦國太夫人鄧氏挽詞

朱藏一丞相內子。

諸父聯丞弼。元夫總化鈞。光華人莫並。恭儉古無倫。沐國三茅土。儀家五鳳麟。塗車閭里慟。矧此故園親。

信國太夫人慕容氏挽詞

蔣丞相母。

望族尙書舊。宜家藹縉紳。無人知善教。有子冠鴻鈞。箕箒惟安禮。詩書不待鄰。鵷堂萬鍾養。風木倍悲辛。

南澗甲乙稿卷四

七言律詩

鹿鳴宴

金殿春風策雋賢，上林弧矢更爭先。不辭老懦聊推轂，要見飛騰總著鞭。勳業肇端登鳳沼，龔公始登政地。詞章接武侍甘泉。侍從諸賢前後多領文字之職。明年貢籍還增倍，定作東州盛事傳。東陽解額其罕，主司有遺才之嘆。國朝故事，所解全中，南宮則次舉許倍增人數云。

立春感懷

南北驅馳老病身，不堪節物更催人。梅梢白白猶藏臘，蔬甲青青便作春。鐵馬漸欣邊塞靜，土牛還祝歲時新。聖朝文物從茲始，元日郊丘得上辛。

喜雪

苦寒無那歲崢嶸，一夜陰風雪滿城。莫問牛羊迂使節，卻思鵝鴨溷軍聲。庭空賸喜羅琪樹，履敝猶堪步玉京。更碾新芽試湯火，從來冷淡是書生。

元夕再用韻

瑤山直上玉梯橫。不用銀花散火城。著柳共看飛絮動。打牕渾作亂蚊聲。路尋鸞鶴天疑近。石壅鯨鯢觀易京。便擬乘風跨滄海。更須新月趁潮生。

春日

霏霏小雨映煙光。睡起文書正滿牀。芍藥倚堦纔弄色。酴醾堆架漸吹香。林端好鳥猶相應。葉底殘花欲自藏。便覺春風如我老。須君駐世有奇方。

春日山中

杜陵愛飲覓南鄰。我亦顛狂不奈貧。漸有好花宜過雨。應須美酒細酬春。十年鄉國無窮思。千里江湖未老身。莫向空中厭愁寂。杏梢桃葉一番新。

雨後睡起有懷

菊枝萱草亂庭隅。旋卷疎簾臥看書。枕簟涼生秋雨後。軒牕睡足晚風初。官閒自愛門無轍。計拙猶慚食有魚。莫遣功名心易老。只應湖海氣難除。

夜坐聞牕下水聲

書史懸知伴此生。敢求身外百年名。青燈又暗吹牕雨。流水長聞入夜聲。玩世久忘榮辱累。定交諳盡死生情。翛然隱几焚香坐。不獨心清境亦清。

曉霽再用前韻二首

隄外幽花無數生。亂紅相映不知名。長條自轉風前影。別壑還添雨後聲。閉戶苦無佳客語。披書聊慰古人情。詩成步逐山腰月。相對茅簷夜色清。

新筍成行嫩菊生。故人爲作小軒名。十年敢有旌麾意。兩部空遺鼓吹聲。世事如塵紛過眼。風光和酒最關情。曲肱不作南柯夢。槐影陰陰枕簟清。

七夕亞之置酒再用前韻（案）此詩題云用前韻檢七律中無之蓋已佚矣

烏鵲無聲夜向闌。空庭插竹巧誰看。長生殿裏金釵暖。百子池邊五綉寒。夢破清風吹雨腳。醉餘新月上林端。閒來不辨論時節。賸喜秋花共夕餐。

九日獨酌

茱萸滿把半青紅。強擬登臨少客同。碧樹池塘秋色裏。黃花時節雨聲中。官閒覓句能消日。酒薄看山尙怯風。高李故人今健否。一樽懷古意無窮。

病中放言五首

松牕永日度涼颺。坐覺清陰寸寸移。境靜故應閒可樂。形臞猶有病相隨。塵埃末路思千里。風露何年飽一枝。百歲窮通吾自了。閉門長詠子桑詩。

長夏空齋冷欲冰。幾愁無米溷鄰僧。途窮誰爲一舉手。計拙自宜三折肱。風靜鳶飛猶跼跼。日斜蚊聚已躊躇。此身示疾非吾病。臥看南山翠作層。

歲月催人易百頭。只應蝴蝶夢爲周。跼蹐久悟人間世。汗漫已期方外遊。化鶴自知迷故國。斷鼇今見立神州。蓬萊水淺君須記。蓮葉翩翩僅可舟。

寓意平生止墨卿。轉喉無奈觸錢神。敢將名利期當世。直欲文章似古人。積雨尙添門外轍。顛風不掃甌間塵。倦游儻有凌雲賦。肯爲黃金巧致身。

少日功名謂立成。壯年漂蕩已心驚。正平只合依文舉。元亮何妨慕孔明。墓上征西真底用。生前杯酒未宜輕。田園待足何時足。歸赴空山猿鶴盟。

有童子市龜七以百金得而放之

百金爲換七玄衣。自啓筠籠俯釣磯。白水真人聊並聘。清江使者遂同歸。負圖可但逢時出。曳尾寧須與世違。好去滄波莫回首。餘不亭下柳依依。

記建安大水

孤城雨腳暮雲平。不覺魚龍自滿庭。托命已甘同木偶。置身端亦似羸餅。浮家卻羨鷗夷子。弄月常憂太白星。當日乘槎使仙去。故人應罪曲江靈。紹興甲子歲予寓建安。夏大水。舉家滿覆。騎危僅脫。因此作詩自唁。乾道癸巳。將命過高郵。遇杜受言。猶子鐘錄以見示。讀之恍然。蓋忘之矣。受言時爲提舉茶事。募人拯予者也。鐘實見之。俯仰三十年矣。死生契闊。不勝慨歎。閏月二十七日書。

與蘇訓直約遊招隱寺

十日春晴未放梅。籃輿端爲看山來。路尋絕壑空流水。寺倚蒼巖只廢臺。處士尙餘三畝宅。野僧合買萬松栽。故知佳興難爲敗。上盡西峯眼界開。鞞鼓初歸塞上師。京江酒美勝年時。春來逆旅真無事。身到名山合有詩。石底於菟窮作穴。泉間科斗鬧成池。荒寒景色君休問。後日應懷此客隨。

雨中同伯恭至湖上

莫嫌鞭馬踏春泥。茶鼎詩囊偶共攜。山色雨深看更好。湖光烟接望還迷。連天花絮飛將盡。夾道蒲荷長欲齊。官事得閒須洗眼。蓬壺只在帝城西。

清明日雨中同中甫子雲二兄集湖上

莫辭沖雨濕春衣。要看湖山滴翠微。絮重欲飛堤柳暗。花寒無賴海棠稀。官忙未覺追遊少。醞美猶堪盡醉歸。屈指薰風來幾日。綠荷簪水已依依。

清明後一日同諸友湖上值雨

出遊初不計陰晴。聊喜湖山信馬行。弱柳自隨烟際綠。幽花還傍雨邊明。嫩蒲碧水人家好。密竹疎松野寺清。爛醉一春纔幾日。可無佳景付詩情。

元襲以詩留別用韻示之

密竹疎松一水邊。高春自占曲肱眠。心如古井真無浪。跡似寒灰豈復然。舌在未應甘寂寞。地偏猶可小

回旋春風又綠池塘草。清夢從今只惠連。
淵明遠屋樹扶疎。大似蓬蒿仲蔚居。老矣強營三徑菊。閒來未厭五車書。詩成歎我同招隱。賦就須君敵子虛。努力青雲家世事。他年簪筆待嚴徐。

清明前一日與客自光孝登般若菴觀鐵塔舊基因至鐵獅頂

青鞵藜杖破層雲。勝日猶能眼界新。窰塔已摧豪士手。狻猊猶現法王身。寺藏松竹疑無地。路接烟霄不到塵。車馬憧憧城市客。舉頭相望幾由旬。先是山半舊有鐵塔。舉子以爲不利秋試。衆手碎之。絕頂有鐵獅子。相傳郡南山爲羣狼形。故以鐵獅子厭勝之也。

夜宿斜溪聞杜鵑

船牕初日弄暉暉。起坐胡牀自攬衣。無數青山隨岸改。幾聲幽鳥喚人歸。鷗盟好在重遊戲。蝶夢驚回果是非。便擬走書聞稚子。歸來同買釣魚磯。

過武夷

不到仙山二十年。道人雙鬢亦皤然。卻看翠嶺千尋石。又汎青溪九曲船。目極已高聊自喜。身輕欲上可無緣。只應猿鶴遙相認。笑我歸耕未有田。

雨中望靈山呈明遠

騎曹公事日紛紛。荀令香爐欲罷薰。冷雨定知還作雪。好山無奈只藏雲。看花便覺名何用。勸酒誰能耳

不聞歲晚官倉塵滿眼。只應清坐獨輸君。

陪曾吉甫遊中山

去天尺五城南寺。目極層軒得此遊。山闊雨收雲點綴。江清日淡柳風流。僧扉繚繞牛鳴地。樓閣參差斗大州。公自蓬萊舊仙伯。一麾真復占龍頭。

勸耕至赤松山

謬誤君恩再領州。名山猶幸復春遊。苦無羽客追元放。尚有羣兒識細侯。麥穗雨晴迷野岸。桃花風急滿溪流。隔林布穀如相應。更酌丹泉爲少留。

自天封登華頂將自桐柏以歸土人謂之望海尖

連天松影轉崔嵬。夾道桃花迎遞開。便覺胸中有東海。不知腳底是三台。閒雲自作千峰雨。流水真成萬壑雷。喚起吹笙王子晉。夜深乘月上瓊臺。

望卞山懷石林翁

卞山苔水共蒼蒼。中有先生萬石堂。早歲英名類終賈。暮年眉壽到劉楊。人琴遂欲成千載。鷄酒猶能醉一觴。身後遺編尙塵積。豐碑誰復付中郎。

遊鹿田寺

路轉崔嵬第一峰。兩仙迎我度空濛。不知屢躡青霄上。但覺身行紺霧中。隴麥正隨高下綠。山花猶作淺

深紅極知靈運真任守。蠟屐穿林興未窮。

同葉夢錫趙德莊遊牛首山

不辭扶病觸春寒。及此新晴一日閒。雲外經年見雙闕。馬頭乘興數前山。清泉細酌巉巖上。佛窟同探紫翠間。我亦無心話禪悅。銜花百鳥自飛還。

寶林院次韓廷玉韻

山繞孤城水拍空。惜無殘月照疎桐。江干雲斷夜來雨。木末涼生秋到風。六代興亡知寺古。老禪神異載碑豐。詩成極目蒼茫裏。惜別情懷醉夢中。

會稽道中有感

稠紅亂紫正芳菲。寒食青門客自歸。江上酒醒聞燕語。日斜睡足看花飛。功名老去真何在。丘壑平生豈願違。尙喜繫船探禹穴。稽山雲淡雨霏霏。

九華道中

行人腳底不生塵。絕壁仙凡路已分。一水奔騰崖覆雪。九峰羅立岫填雲。謫仙才大三千首。國老謀深十萬軍。莫對青山歎華髮。丹砂未就又論文。

至日建德道中

聖皇初歆帝中壇。羽檄交馳玉仗寒。佳節又看當警急。勞生底用較悲歡。腐儒憂國成千慮。強敵窺人詎

一端夢想淮南風雪裏，可無消息報平安。

葉丞相最高亭

丞相園林景物繁，花亭那更得躋攀。平看溪上千尋木，不數城南萬疊山。歌舞恍如銀漢外，笑談常在碧雲間。醉酣欲問劉公客，百尺樓中亦汗顏。

賞心亭

亭後世傳張麗華墓。

北風吹雨冷如秋，更上江干百尺樓。瓊樹佳人閉黃壤，石城華屋變滄洲。三峰已覺蓬萊近，二水真成汗漫遊。六代風光幾人物，不妨擁鼻向南州。

重建極目亭

曲闌十里畫屏開，氣壓凌歊百仞臺。不盡溪光空外見，無窮山色望中來。旋規北檻栽新竹，更闢東牕對野梅。老子興來真不淺，清秋忍負十分杯。

次韻張子儀倉司展翠亭

官事常忙心自閒，故應拄笏爲西山。舉頭但覺來風月，著足何妨涉闌闌。振廩功成聊共醉，追鋒詔下合俱還。陳天與爲守和篇，有叩闕把錢之句，二公皆卽召用矣。須知蒼翠看無盡，輸我巖居晝掩關。

晚登凌風亭戲作

咄咄真成了事癡，功名何在鬢霜垂。清談安得如夷甫，佳句無勞發愷之。山色倚江秋更好，煙光連市晚

偏宜田園底許歸能決。且擷黃花付酒卮。王夷甫清談終日。縣務亦理口未嘗言錢。顧愷之見張融海賦云。但恨不道鹽耳。因增熬波之句。二事皆所困者。因以自哂。

再至凌風亭

目盡西山落照邊。危亭風景故依然。重來身忝二千石。老去心驚十九年。種柳已高丹檻外。栽花猶占綠牕前。不堪素髮紛垂領。還愧青春令尹賢。

題長春亭

一徑清深不起塵。芳菲紅紫意隨人。應知地勝無非景。但有花開即是春。萱草自隨蘭葉茂。棠花還與桂枝新。綵衣兄弟人生樂。莫惜支筇步武頻。

題蒼筤亭

手種蒼筤數百竿。築亭相與枕書看。故知落落非春事。直有青青共歲寒。一壑自欣幽意足。三年獨得此君歡。蕭然風露千尋影。搔首哦詩獨凭欄。

采箬亭

山繚重城水拍堤。雨晴秋浦靜相宜。新篁弄日千竿玉。紋簾披風八尺漪。坐對芳洲端自樂。興來小艇亦頻移。他年穩侍蓬萊殿。聊記高亭一笑時。

畫寒亭

月裏瓊宮一禁寒。誰令白晝墮人間。陰風淅淅來深谷。晴雪霏霏澱兩山。靜愛飛流聊洗耳。坐看絕磴可怡顏。紅塵熱客那知此。赤脚青松意自閒。

凌歊臺

山到西江勢卻回。倚山樓殿更高臺。天容水色望中見。帆影車塵空際來。桑柘基分千里迥。波濤壁立兩峰開。登臨擬問興亡事。白塔亭亭鎖翠苔。

蓬瀛臺

雨餘天宇澹澄瀛。及此秋郊一日晴。軒蓋翩翩度林影。笙簫隱隱雜溪聲。風隨廣席歌呼轉。雲滿高臺步武生。記取今年作重九。丹崖絕壑是神清。

錢伯同新創明暉閣

使君談笑兩橋成。人向晴虹鏡裏行。更闢軒牕待遊覽。要看山水倍澄明。波寬十頃知魚樂。歲熟千家響碓聲。收拾風光付華月。一樽還記昔文清。闡名用曾文清詩語。

題金元鼎至樂堂

百歲休論七十稀。羨君林壤得熙怡。賦歸已久同元亮。至樂真能慕啓期。一壑過人聊自足。萬鍾于我亦何思。故應不羨紆朱貴。元鼎辭倅得祠。帶索行歌世未知。

題十二兄野堂

少年行樂記鄉關。月渚霞洲一夢間。爲愛軒牕臨野水。只疑風景是家山。荷香柳影情偏厚。竹色松聲意自閒。堪笑主翁持節手。卻來垂釣傍蒼灣。明月清。落霞洲。許昌湖也。

韓子師讀書堂置酒見留

醪醑插架未成陰。水滿方塘數尺深。入戶幽花真有意。拂簷高竹更關心。鳴禽喚客知閒景。舞鶴迎人作好音。莫道相逢欠歌管。一觴酒盡讀書林。

山橋

倚杖溪橋暮雨垂。春寒空翠著人衣。凌空怪石如旗豎。噴壑清泉作練飛。乘興正須隨地飲。醉狂聊共插花歸。從教拍手兒童笑。要是山深客到稀。

范良臣見過云有食粥之憂以斛米助之因得長句

口飢豈復衛文子。闕食尙憐顏魯公。定知啜粥可餬口。未至腹疾號山芎。東方千牘羨飽死。顏氏一瓢嗟屢空。我家無錢但斛粟。與子共坐詩能窮。世傳兩貧士爲鄰。其一有餽之斗粟者。抖擻饑中。僅得數錢。以勞其持餽至夜。鄰士叩門。假一二錢市油誦書。則嘆謝曰。盡之矣。既而愧甚。曰。尙有斛斗。可分子也。故用爲戲。

伏日諸君小集沈明遠以小疾不預作詩戲之

廣文官冷酒錢空。平日清樽一笑同。苦憶車公來座上。翻成三老隱牆東。定中示病應非病。詩裏能窮有

底窮涼月滿天新雨足。試憑檄語愈頭風。

聞吳端朝作真率集

他年曾作社中人。骯髒歸來白髮新。闊別常思共杯酌。舊交那得更比鄰。黃鷄白酒可勞勸。青筍烏棗未絕貧。恨不從君語終夕。空齋愁坐獨傷神。

令防得女招飲以病不往走筆戲之

平生諸女重吾貧。敢意君家亦效頻。醜惡未妨攘盜賊。長成難議卜比鄰。予與令防昆仲鄰居。比皆得女。遙憐四十稱郎罷。豈惜千金辦主人。美酒尙須留待我。明年應見玉麒麟。

次韻陳子象謝新火詩

曲水流觴迹易陳。水邊那復御廚珍。茶煙永日看輕颺。槐火今年又一新。鄰舍未應煩束縵。官庖猶幸有興薪。須公更試長檠夜。曠照歌臺拂鏡塵。

李彭元攜會吉甫詩卷數帖見過

十年松竹暗茶山。君有詩聲舊將壇。食齋誰如東野苦。無氈不奈廣文寒。閉門久詠高軒過。彈鋏今嗟行路難。我亦凋零舊賓客。遺編聊共拂塵看。

李子永惠道中詩卷

踏雪衝寒徧幾州。豈妨乘興作清遊。風橫白鷺歌瓊樹。月滿青山問釣舟。夢繞征途渾歷歷。老諳世事總

悠悠塵埃鞅掌君休恨。自有詩輕萬戶侯。

熊子復惠十詩作長句謝之

白首相期翰墨中。衰齡況是甲庚同。久懷妙論傳犀麈。尙喜清詩附驛筒。柳長五株知詎少。麥呈兩穗報年豐。去天一握歸來近。密令疇庸可拜公。

姜特立寄近詩

雙溪巖曲蘆江岸。每見君詩句益奇。漸喜青雲今得路。豈訪白雪尙攜詞。斷蛟入海功何壯。披腹排雲世共知。斫卻月中丹桂手。朝陽應占鳳凰枝。姜五中鄉薦今爲春坊。

周航定國攜諸公所贈詩求次韻

拾青紫本一經明。得失由來信可驚。美玉固應人未識。千鈞何自俗能輕。馬曹寂寞心空在。驥子昂藏骨更清。航有子預薦。穩步煙霄遲速耳。筆端夢覺已花生。

季元衡寄示三池戲藁

文彩風流冠一時。三池聊作鳳凰池。新詩到處傳桐葉。麗唱他年滿竹枝。歸夢故應懷古括。清談還喜對峨眉。玉堂待草山東詔。解纜春江莫放遲。

曾丰惠文編

簿領裝懷筆擁塵。經年舌強不論文。趫然步武心還喜。籍甚聲華耳舊聞。曲水賦詩須鮑謝。甘泉第頌憶

淵雲相期穩上芸香閣。要策清時翰墨勳。

徐應祺惠文編

渴雨空齋晝不眠。疎簾竹簾意愴然。借君妙語清祥暑。起我哀悰似壯年。得意每看雄覓句。逢時曾奏白雲篇。漢庭久重春秋學。凌厲煙霄更著鞭。

寄懷子雲兄

長年游宦已堪嗟。寓舍無田豈是家。母子分飛還歲換。弟兄相望各天涯。塵埃閱世丹心在。朱墨縈人兩鬢華。聞道過庭新哭鯉。開書空有淚橫斜。

赴信幕寄子雲叔喚及同寺

田園未辦各身謀。兄弟今成迭去留。游宦三年方啓足。寄書千字又從頭。家書以千字文爲號。白雲不定山容晚。碧水無窮樹色秋。回首寺橋同社客。想因明月話離愁。

謝三船上醉同歸。黃四花邊手屢攜。巷裏何曾異南北。屋頭還復記東西。一杯相屬情猶在。千里分飛意自迷。堂下秋來足萱草。定傾家釀飲黃鷄。

初至上饒寄子雲

險阻艱難客路賒。東西南北問生涯。秋聲瑟縮生梧葉。野景蕭疎上菊花。去國已驚身老大。無家空有淚橫斜。遙知載酒齊山寺。應憶年時醉月華。

寄梁士衡癸酉年作

江上潮聲日夜來。相望蹤跡共塵埃。亂花洗雨紅成陣。疊嶂連天翠作堆。山市放歌知屢醉。沙津獨步想千回。松林月出溪橋夜。猶憶當年對野梅。

夜坐有感寄子雲金陵作

風景新亭舊往還。誰能舉目較河山。宦情老去秋多感。官事忙時夜始閒。牕外橋梧風瑟縮。竹間亂石雨淙潺。青燈已作江湖夢。同約歸期早晚間。

過龐祐市

半畝方園水到門。地偏人靜恰如村。聲名不用卿王衍。文字真能僕屈原。舉世知君如我少。平生學道欲誰論。何時共結柴桑社。籬下秋來菊正繁。

劉子淵監廟年八十六耳目聰明能飲酒舉大白喜賦詩比過之因示長句次其韻

才疎政拙愧能名。黃髮猶欣見老成。林壤固知聊自樂。門閭要是已堪旌。持盃潑灑千眉聳。落筆縱橫四坐驚。笳鼓過君應一笑。平田兩部足蛙聲。

過趙仲績

山下清溪溪上亭。竹陰芳徑眼增明。已知數日逢寒食。賸喜今朝作好晴。酒美故應容客醉。歌長不自覺詩成。春深準擬多行樂。卻作花前送我行。

秋雨新霽過趙慎中留飲

門外黃塵有底忙。主人高臥興何長。春風竹樹簫笙轉。雨足軒牕笑語涼。耳熱漫思官裏事。眼明猶識醉時粧。紫雲莫厭頻來客。未抵當年御史狂。

陸務觀赴闕經從留飲

溪岸風高霜作枝。杯盤草草對青燈。已甘鹽菜待梁柳。況有酒漿延杜陵。歲晚鬢毛紛似雪。天寒門巷冷于冰。春風穩送金闈步。看躡鰲山最上層。

寄徐滁州培立

青瑣金鸞跡未容。真公猶在昔賢中。著書定已追迂叟。聞編通鑑後事甚備。得那何妨號醉翁。豐樂橋邊魚動鏡。清流關下馬嘶風。獨憐湛輩猶奔走。不得登臨一笑同。

寄別子雲

江干風雪敝貂裘。兄弟相看已白頭。兩月追隨無十日。一春離別甚三秋。清時官職難頻竊。異縣田園合早求。並戲母前端有日。省郎雖美不如州。

次韻沈駒甫留別

筆下縱橫自學林。胸中玉海更清深。識君異縣見眉宇。過我空山聆足音。月近中秋還惜別。雪飛窮臘會重臨。閑門剝啄誰相問。與客寧論舊與今。

別范元卿

晴林綠樹越江邊。聊泊東來倦客船。風引花香微近酒。水浮月色澹連天。驚心朋舊皆千里。回首光陰又五年。莫笑相逢便離別。此生身計已飄然。

松江別范至能朱伯陽

彈鋏功名易白頭。歸歟未辦五湖舟。送君與我皆爲守。到處逢山且縱遊。薄日連雲千幃曉。斜風吹雨一江秋。買魚斫鱸垂虹上。更爲今年好景留。吳歛灣月韻江船。屈指同行二十年。勝日五湖看老矣。倦游雙鬢各蒼然。擬尋詩酒平生社。未了塵埃薄宦緣。後夜西風相憶夢。琵琶亭下水籠烟。

留別傅安道

華髮相看四十年。飽諳世事欲忘言。一春離別當寒食。再歲追隨作上元。湖外溪山明小檻。雨餘花柳暗西園。極知老大交朋少。相與論文更一樽。場屋俱爲拜賜師。烟霄獨喜鳳毛飛。壯心似鐵何曾老。健筆如椽合一揮。北渚青山勞我夢。西垣紅藥待君歸。韶環不作經時隔。沙路薰風卷繡衣。

南澗甲乙稿卷五

七言律詩

送湯丞相帥會稽

淮岸春來罷夕烽。君王奏凱大明宮。守關豈但勤蕭相。分陝猶宜屈召公。綵綬不妨龍袞貴。錦衣眞與故鄉同。政成更上平戎略。歸作麒麟第一功。

翰墨英名多士先。經綸長策萬方傳。久知燕許文章大。要自臯夔事業賢。曲水蘭亭脩竹外。都門祖帳百花前。去天尺五關元舊。肯使邦人借一年。

疇昔追風幸執鞭。詞場好在筆如椽。十年騅驥猶瞠若。晚歲登龍未偶然。下客陽春驚白雪。何人綠水近紅蓮。尙應九里蒙河潤。他日一天今二天。

送周承勛赴荆南幕

周南留滯幾年餘。筆力追還兩漢初。無地眞君羣玉府。因人貽我萬金書。未嗟王粲依油幕。聊喜安仁奉板輿。夢想風帆轉平楚。眼明江樹綠扶疏。

送馬莊甫攝幕鄱陽用趙文鼎韻

杖策衝寒不作難。弓刀結束笑談間。便從幕府清民訟。已佐戎車靖蠻蠻。風雪幸無千里路。江湖纔隔數重山。金南桃李新開徑。屈指春融及早還。

送陳天與知徽州

臺閣英名二十年。卜居那得便林泉。履聲舊振星辰上。諫墨猶存雨露邊。欲考治功三輔近。且施惠政一州先。黃山看盡須黃閣。六月天池更著鞭。

送陸務觀得倅鎮江還越

高文不試紫雲樓。猶得聲名動九州。金馬漸登難避世。蓬萊已近卻迴舟。燒城赤口知何事。許國丹心惜未酬。歸臥鏡湖聊洗眼。雨餘萬壑正爭流。前年邊馬飲江水。烽火瓜州一水閒。正使樓船多戰士。要須京峴作重關。平戎得路可橫槊。佐郡經時應賜環。把酒賦詩甘露寺。眼中那更有金山。

送陸務觀福建提倉

舫船相對百分空。京口追隨一夢中。落紙雲煙君似舊。盈巾霜雪我成翁。春來茗葉還爭白。臘近梅梢儘破紅。領略溪山須妙語。少迂使節上凌風。僕爲建安宰。作凌風亭。

送呂令防赴海門宰

五斗由來豈療貧。尙應絳笏對秋雲。未嗟薄宦來還去。但覺頻年我送君。舍北水生思共賞。淮南米賤好

相聞。白魚青笋平生事。愁絕江寒鴈影分。
野閣山扉舊卜鄰。竹陰花徑每情親。舉觴契闊又千里。同社淒涼無幾人。濯濯未妨如月柳。悠悠真不奈風塵。海門應去蓬萊近。我欲乘桴試問津。

送趙蕃辰州司理字昌甫

故家零落眼中稀。歲月崢嶸踏路岐。詩解窮人君莫恨。錢能使鬼我方知。片言折獄非無日。談笑封侯會有時。一上梅山弔繁瓠。賸題佳句寫幽思。

送張幾仲知秦州

紫橐甘泉不願留。虎符聊試海邊州。長城底用騎團鐵。下瀨直須船有樓。草木已應知世望。江山好在得詩流。春風桃李西溪路。宣室歸來尙黑頭。

送施徽州二首

御史英名世罕儔。義冠聊復漸承流。治功要自先馮翊。大惠何妨始歙州。野媼定知還去虎。山民從此罷賣牛。二事見唐劉贊。崔元亭任歙州刺史。百年善政須公繼。尺一書頒願少留。

江出新安見底清。黃山高勢碧崢嶸。袴襦會遣民皆有。枹鼓懸應夜不鳴。蠟屐未須懷別墅。虎符今喜得名城。他時一榻容徐穉。端共與人樂政成。

送李子永赴調改秩

逸驥騫騰十二閑。追風那復駐轅間。向來官況誠留滯。此去詩情記往還。會課未妨更美秩。趣班聊喜近天顏。割鷄莫費千牛刀。奏賦金門入道山。

送王德和赴調改秩

樽酒盤蔬語夜闌。三年猶得幾追歡。海棠半折春方好。楊柳都青社正寒。籌畫定應瞻武帳。文華端合侍金鑾。割鷄底用磨天刀。遲日湖山滿意看。

送葉夢錫赴荆南

南郡開邊古上流。君王側席用嘉謀。壯懷何止入雲夢。雄略行看半九州。風勁聲聲連岸動。雪晴江影與天浮。一樽莫作新亭語。勳業歸庸尙黑頭。

送韓子師守婺州

功名相望十年前。白首官曹僅接聯。良玉要須更九火。明珠那得闕重泉。清風遂作雙溪詠。老手懸知劇郡便。奏課不妨聊第一。歸來更著祖生鞭。

送沈千里教授邵陽

數紋江畔得君詩。俊逸清新字字奇。一笑偶成歸妹約。幾年還見外孫辭。橫經絳帳地雖遠。給劄金門天未遲。痛飲離騷吾事爾。湘山風物與春期。

送潘元夙教授欽州字子春

文筆超然自不羣。胸中韜略未全陳。詎應遠教嶺南士。曾見來清塞北塵。桂海接天聊縱目。火雲堆露正關身。元戎在昔同科彥。一鶚飛書上紫宸。桂帥王舍人亦中兩科。

送澤赴新塗尉

少年薄宦幾東西。送汝臨岐意尚迷。作尉未嗟官職小。致身當與古人齊。短篷載雪看梅蘂。古驛衝風信馬蹄。爾父漸衰吾已老。寄書時一到南溪。

送李直剛鹽官縣尉

蚤接君家大父遊。迺翁幕畫尙淹留。文華遂見諸郎秀。名宦懸知異日優。朝雨拍溪梅正熟。晴雲烘路麥初秋。渭南自昔多賢尉。官近長安不用愁。

送元修歸廣東

十年門戶苦彫零。屈指天涯幾弟兄。羈旅可堪懷世事。典型誰與振家聲。驚心朔岸秋風急。極目南溟瘴霧橫。好過貪泉未應酌。少年游宦要冰清。

送沈駒甫

官曹邂逅得情親。一賦松齋遂絕塵。天祿校書元有路。甘泉第頌可無人。江山興味不知老。芋栗生涯未覺貧。我欲邀君寺南住。春風聊與杏花鄰。

送孟壻植還臨川

西風同泛整江船。倒指光陰六換年。秋色又看梧葉老。離懷還對菊花前。塵埃左宦空搔首。功業青雲更著鞭。兒女關情易來往。一樽臨路亦悽然。

送郭誠思歸華下

忘懷物外且如愚。何事勞精據槁枯。以馬喻馬卽非馬。數輿無輿方得輿。莫執斧斤過櫟社。懶施几席向蓬廬。好歸玉秀峰前座。閑看晴雲自卷舒。

依韻和御製秋晚曲宴詩

巍巍舜治泱嘉生。宴俎豐年萬寶成。禁幄雲深開曉色。上林風迴起秋聲。威加鼙鼓雷霆轉。喜動龍旂日月明。應手神珠看電擊。旄頭消盡鐵山平。

次韻子雲春日

林壤欣欣樂有餘。杖藜常及曉鶯初。春風入戶花開落。晴日當牕雲卷舒。契闊經年千里面。平安滿眼數行書。弟兄州縣真勞爾。疇昔交遊半石渠。問舍求田苦未成。定逢丘壑眼先明。極知官事無時了。且作青山任意行。元亮折腰應自笑。子荆洗耳詎忘情。不妨同是催科拙。下考他年更類城。

次韻子雲途中見寄

輕風獵獵轉殘紅。春去荒村暮雨中。花影帶寒猶黯淡。山光和霧更空濛。百年拚卻身長醉。五斗由來計

日窮慚愧賓朋有膠漆。不堪兄弟苦西東。
十年計拙未能伸。四海滔滔總是津。但得有山供醉眼。不憂無地著寒身。鶯花撩亂空三月。風雨淒涼過幾旬。莫道衡陽無鴈信。故應時有北來人。

次韻子雲盱眙道中三首

海上狼烽不起烟。兵戈猶記舊年前。巖居有客能招隱。肉食何人爲給鮮。但得生涯類盤谷。可無風景似斜川。共尋餬口田三畝。仍辦遮頭屋數椽。
江南淮北市初通。人語忻忻作好風。抱耒只思耕隴底。買船誰復渡遼東。向來熊耳真投甲。此去天山擬挂弓。上策聖君今自治。白頭憂國寸心同。
桑間無褐半飢人。斗粟千金不換銀。末路多慚追溝壑。長年敢笑走埃塵。江聲直下黃牛峽。河勢遙分白馬津。回首向來征戰地。壯懷俱在只傷神。

答金元鼎喜雨

幾日雲陰合又開。良田秋近起黃埃。一觴未致靈祠禱。半夜先欣好雨來。政拙自知容我懶。詩清要是得君催。不妨咳唾皆珠玉。漸喜新涼入酒杯。

再次韻

雨後紅蕖滿意開。風前綠淨絕纖埃。獨憐病守孤吟賞。猶幸詩翁數往來。農事已知溝澮足。歡聲不待管

絃催旋春玉粒添冰釀。莫負樽前鸚鵡杯。

次韻趙文鼎雨中

老病幽栖不厭閒。未須消息夢長安。一春意淡連牆竹。終日香清小檻蘭。紅藥便驚風裏盡。青林猶愜雨中看。故人詩卷從頭讀。似酌芳樽爲解顏。

次韻中甫兄九日同集張園

湖山秋盡作幽期。未覺浮舟菡萏衰。怯酒自憐多病後。強歌還憶少年時。平蕪半綠煙猶接。好菊微黃雨更宜。單父層臺在何許。一樽懷古少陵詩。

雪中走筆寄鄧延碩

去年雪裏共清遊。蕭子酣歌幾唱酬。竹葉又看新釀熟。梅花還作暗香浮。青衫尙想君奔走。短褐空嗟我滯留。南北兩峯銀色界。不應孤負水邊樓。

和同僚賀雪應祈

臘近春臨雪意遲。蓑衣敢憚走靈祠。夜聽小雨猶傾耳。曉看羣山頓展眉。好句懸知得冰柱。香醪試爲壓羔兒。便應風月臺中客。不減梁園賦就時。

次韻韓子師雪中二首

九門疊壁耀朝暉。不比千燈作上元。天與藥珠開漢殿。人將冰玉奉堯樽。寒威已覺邊聲靜。春意都隨詔

語溫夜入蔡州飛將在。肯容敵騎妄稱尊。
曲欄高檻倚崔嵬。要是仙京白玉臺。雲色自連鵲動。天顏亦爲近臣開。光翻午夜渾疑月。花滿新春未
數梅。自笑詩成無好語。但知縞帶與銀杯。

次韻黃文剛秀才雪中見詒且惠新柑

填空密雪借風威。深閉蓬牕晝掩扉。待學仙人乘鶴駕。未容寒士泣牛衣。連篇妙語千金重。滿合黃柑數
寸圍。細酌清樽酬夜月。更看庭樹作花飛。

次韻梁子張雪中約遊湖上不至

東風閣雨釀重雲。賸喜天街玉作塵。梅已著花還點綴。柳能吹絮便爭新。湖光照坐偏宜晚。酒力欹欄別
是春。慚愧相如未能至。卻將冰柱語驚人。

次韻子雲歸興

湖海周游未卜居。好山時一夢衡廬。苦無事業堪調鼎。薄有生涯可負鋤。玩世阮公方蠟屐。歸田陶令亦
巾車。屋頭早晚東西住。愁絕江船夜雨餘。

次韻曾吉甫題畫屏風

何許江山發興長。渾疑廬阜對彭郎。胸中丘壑元蕭爽。筆下煙波故渺茫。落落疎松長映座。冥冥飛雨欲
侵牀。冷然已作華胥夢。便有羣仙到枕旁。

次韻王季夷時同宿蔣山

亭亭石塔寶公龕。曠喜僧牀得對談。坎壈詞場君亦滯。驅馳世路我何堪。軍書又見紛南北。敵勢由來說二三。淮岸西風晚更急。似傳烽火過江南。

次韻沈千里玉山道中見寄

霜晴懷玉自生烟。寒色淒淒過鴈邊。路轉湘南知幾日。山連楚尾又窮年。相期鷄黍情歡甚。惜別塵埃意黯然。馬上哦詩衝暮雪。清風懷我北牕眠。

次韻沈姪

平生作計本山林。便腹空餘貯古今。致主未忘他日志。歸耕每動十年心。疎翎浪喜煙霄近。弱植多慚雨露深。早決儒科猶望汝。蛩然虛谷佇聞音。

次韻季子永見慶新居

旋移桐樹占高岡。更喜松筠翠作行。簷外參差見林影。門前溶漾足溪光。天涯留落還相識。地上經營豈太忙。好事肯來三徑在。已添籬菊在重陽。

次韻沈駒甫觀石井

湖裏鴛鴦亦洞天。最奇山下石坳泉。一泓自覺寒光淨。六月都無暑氣煎。清似錫峰藏雨露。迥如篁嶺闕風煙。壁端舊乏騷人句。從此須君妙墨傳。

次韻王亞之來過橫碧

君到層軒眼爲寬。諸峰還得雨中看。嵐光照座蒼翠出。寺影拂波金碧寒。詩興豈妨隨望極。秋聲不柰起愁端。相逢莫怪無樽酒。秀色崔嵬尚可餐。

次韻宋傳道夜雨聞捷

松庭竹戶野僧家。獨坐荒齋到日斜。門外江風寒作雨。城頭戍鼓夜啼鴉。對牀更欲論心事。擁褐還驚逼歲華。卻憶巴山舊詩語。夢回牕竹已生花。邊地山川自漢家。畫旗圖畫拂雲斜。江干戰騎磨如虎。塞上神兵斧似鴉。羽檄故應煩號令。星車底用賦皇華。軍聲指日騰三捷。陣勢他年本六花。

再用前韻戲傳道

空谷天寒翠袖遮。無人曾見玉釵斜。詩成落日千尋竹。歌就殘陽萬點鴉。粧額淺深知內樣。舞衣裁翦勝京華。自憐已作高唐夢。須信飢腸眼易花。

次韻趙仲績久雨夜坐有感二首

春雲黯黯未成晴。落盡綳桃見紫荆。薄宦驅馳雙鬢改。流年荏苒寸心驚。幽花映水淺深色。啼鳥穿林高下聲。幾許風光欠行樂。夜寒和雨聽殘更。十日風斜雨更橫。一春能得幾新晴。便須蠟屐穿花去。莫惜障泥傍水行。酒興未妨隨處發。詩狂賸判隔

年程醉來乞得西山藥。髣髴雲間吹鳳笙。

次韻張晉齋書事

舉世諸兄事孔方。平生學易問歸藏。漸欣過客知吾懶。未怪小兒如我長。鶴怨猿驚成底事。烏踰兔蹶自奔忙。便須耳熱追行樂。更擬心齋得坐忘。

次韻吳明可與史致道會飲牛渚

月出千山捲暮雲。遙知玉節會江濱。便應擊楫酬今日。不用然犀歎昔人。煙外笛聲誰送晚。水邊花影自迎春。風流三百年無此。況有清詩句法新。

次韻徐應祺小樓

漱漱清波泊路衢。垂垂高柳對扶疎。已知百尺樓堪臥。況有三重茅可居。我老詎能廣鮑謝。君才端合紹嚴徐。直須座上千鍾酒。澆起胷中萬卷書。

次韻答沈明遠

如君絕足向風塵。顧我宜爲途路人。阿買八分時自笑。阮瞻三語詎能新。狂談尙欲嘲風伯。妙筆真堪賦洛神。得酒相尋那厭數。醉歸官長未應嗔。

亞之出示其祖岐公墨迹及惠崇小景且和前韻復次答之

壁上春江萬頃寬。錦囊遺墨幸重看。功名世路真多畏。貧賤交盟敢自寒。新有詩聲見侯喜。盡據懷抱得

蘇端極知鼎食君家舊。未厭堆盤苜蓿餐。

新晴梅花可愛欲招明遠少稷凍醪未熟

癡兒了事不能閒。猶喜騷人共往還。歲晚真成廢書史。雪晴那得負江山。多情春與梅花厚。一醉天子我輩慳。賸作新詩催酒熟。曲池冰斷水潺潺。

紅梅

不隨羣豔競年芳。獨自施朱對雪霜。越女漫夸天下白。壽陽還作醉時粧。半依脩竹餘真態。錯認天桃有暗香。月底瑤臺清夢到。霓裳新換舞衣長。

陸子逸惠桃花戲贈

故人招我千山裏。也有仙葩巧送春。麝馥染衣金縷重。酒紅生粉玉肌勻。洛城景物知誰紀。寒食風光觸處新。莫把天香調行客。曉粧留與綠牕人。

次韻陳子象十月惠牡丹

芙蓉掃地菊花陳。國色天香一夜春。愛景自催芳意動。清霜不礙曉粧新。長生便可書仙籍。上瑞端宜首貢珍。是日會慶節。〔案〕孝宗生辰名會慶節。詩就只應開頃刻。先生筆力起千鈞。

用前韻以小春茶餉子象

仙花不用惱詩人。亦有靈芽特地春。數朵嬌花真綽約。一甌皤白更清新。眼明共識西都豔。齒冷應懷北

苑珍佳茗奇葩堪竝賞。須公品第入陶鈞。

次韻余寺正瑞香花

香爐峰下異香風。長憶幽芳夢寐通。渴雨旋傾茶作椀。護霜新織翠成籠。丹青點綴瓊瑤上。蘭麝飛浮錦繡中。花品曩來誰第一。似按玉葉間韞紅。

故致政宣義葉公挽詞

葉山父

植德由來不自知。成家今見寧馨兒。名駒有種能千里。仙桂騰芳定五枝。公有三子二孫。綵綬螭坳方致養。素車雲路忽興悲。死生了了真餘事。流水斷煙空好詩。

挽王僑卿右司詞

壯年嘉譽謫瀛州。袞袞諸公並儔游。獻納未持天上橐。光華頻總嶠南州。牢盆賸算波熬素。蒲澤終期劍買牛。世路榮枯真莫問。浮雲山眇淚橫秋。

挽汪南美大夫詞

年如衛武尙安強。名似康成善一鄉。三邑久知歌惠愛。西州何幸著循良。真清在昔傳家世。治狀由來籍廟堂。千載蔣山分未朽。芝蘭玉樹藹餘芳。

挽知泰州宋公大夫詞

投老溪南幸卜鄰。一麾頻見寵章新。養花別圃成三徑。種木佳城度十春。公自營壽藏甚久。前席遂孤明。

主意公入對天語甚寵留鞭難繼澧陽塵空餘樽酒追隨地同社淒涼淚滿巾

挽故鈴轄趙公彥遠詞子直父

平昔長材未一施。尙餘嘉譽藹天支。事親養志人爭仰。教子成名世共推。盛德故應傳後裔。清規誰爲勒豐碑。華林岡下寒泉水。隱隱雷聲紀孝思。母夫人畏雷他日彥遠聞雷輒涕下

楊待制挽詞

妙齡著足道家山。壯歲升華玉笋班。千里麾符纔假手。幾年香火竟投閒。詩書坐使家聲大。簪紱誰令壽歷慳。太傅功名有遺恨。鵷雛凋落淚頻潸。

周彥廣待制挽詞

淮海歡騰五袴歌。政聲京兆益中和。鄴侯井在功堪紀。鄭國渠成利更多。紫禁遄躋知異眷。珍臺歸臥本微疴。功名方展凌雲步。奈此佳城白日何。

故運使直閣少卿劉公挽詞子履

清時得路每投閒。垂上甘泉玉笋班。借箸幾看趨魏闕。請纓常欲度天山。放懷俠氣千夫上。抵掌高談一夢間。使節塵生人共惜。朔風吹淚太湖灣。

故致政敷文少卿魯公挽詞

左學摛文藹儁聲。青雲接武二難兄。主知自紀宜三院。使節更持僅九卿。庭下芝蘭方競秀。舍南桃李已

成陰掛冠不待甘泉臺。愁絕高門淚滿纓。

故致政提刑少卿方公挽詞

籌策需榮譽最賢。青雲回步接英躔。請纓莫遂終軍志。投紱方期衛武年。原隰觀風頻玉節。省臺聯秩近甘泉。一舟五鶴符佳夢。陂水成湖問葛仙。

挽主奉路分趙公詞 文鼎公

畫舸安輿雪水清。春風猶憶送君行。無家舉案人方恨。有子分符世共榮。德履未容居祭酒。聲華端合主宗盟。太支耆老凋零甚。蘭玉階庭獨擅名。

故提點判院魏公挽詞 公濟

當年卓魯盛材猷。循吏聲名始一州。功在龍津看雨施。風行金穴見錢流。褒庸合上清華貫。奏課俄驚疾病留。嶷嶷諸郎富儒雅。蓋棺十世可無愁。

劉子宣侍郎挽詞

妙齡嘉譽滿江東。晚接甘泉豹尾中。烜赫身榮知有道。從容心計不言功。威行峴首追羊叔。名在鄱江憶魯公。種木十年歸莫遂。塗車千里恨何窮。

李壽翁侍郎挽詞

同解銓衡並把麾。五年相望楚江湄。鄰牆會面嘗談易。吏選偷閒更說詩。北客遭逢人共歎。

公陸辭日。上

有北人難得之諫。南州流轉事難知。投簪自有江湖志。雲白天青淚滿頤。公臨終作詩。有白雲青天之句。

挽周仲深郎中詞

才力軒軒動漢庭。清時指日致功名。一同在昔歌遺愛。兩郡于今有治聲。使節暫分秦望重。郎星初近太微明。死生契闊空泉壤。賻典殊恩世亦榮。

王中奉漢老挽詞

符節光華二十春。壯猷曾不侍嚴宸。棲心香火纔同社。放意溪山幸卜鄰。再世簪纓宜袞袞。一門蘭玉尙詵詵。霜清三港追隨地。丹旆飄然淚滿巾。

呂伯恭挽詞

青雲塗路本青氈。聖願相期四十年。臺閣久嗟君臥疾。山林空歎我華顛。傷心二女同新穴。拭目諸生續舊編。斗酒無因相沃醑。朔風東望涕潸然。

周濟美挽詞

迺翁持橐舊知名。兩郡分符見典型。禁闥方應馳備步。中臺俄忽隨修翎。故人零落風前葉。北客漂流雨後萍。白馬素車三巷路。淚兼臘雪灑林坰。

暉仲叔挽詞

材業光華薦薦紳。由來孝子出忠臣。七十叔祖世稱孝子。載樹陰舊話。五年字邑祇明詔。兩路觀風惠遠

民徐穉湖邊纔卜築。葛翁山下忽棲神。朔雲千里人揮淚。遺命歸從大母鄰。

五言排律

次韻唐與正喜雪二十韻

窮臘逢三白。山城兩換年。破寒初浙瀝。作態正翩跹。倚杖心逾喜。搔頭意自便。直疑填巨壑。豈惜涸長川。宮粉慚施白。仙禽恨奪鮮。銀牀凝露綆。玉柱溢風絃。徑滿巖難認。牕虛隙易穿。共尋瑤草路。俱誦藥珠篇。獵騎朝羣擁。漁燈夜獨然。凌風幾闋苑。照日盡藍田。賸約佳賓集。先煩好句傳。荷枯疑壁碎。柳細訝絲牽。有士迷青眼。無人笑黑肩。豐年期不日。瑞氣竊非煙。竹密還爭舞。梅疎只鬪妍。輕鷗隨浩蕩。戲蝶伴聯翩。強續麻衣詠。真逢綈帶賢。凋零屬國節。片段廣文氈。短棹尋安道。高樓憶仲宣。名駒紛照夜。無復愛連錢。

湯丞相生日二十韻

寶歷千齡會。神槎八月流。人知挺生傑。天欲中興周。文筆超三古。聲名溢九州。宏才自伊呂。餘事豈應劉。繫昔開黃閣。于今尙黑頭。裴公旋臥護。蕭相暫居留。烏奕稽山綬。光華綠野遊。銀與壽母貴。玉耳上公優。嗣聖資爰立。昌時副聿求。來歸嘉季子。入覲偉韓侯。今日恢王略。蒼生跋廟謀。中原尙紛擾。絕塞要懷柔。勝算如先定。成機會可投。洪源端欲汎。前箸匪無籌。日月符羲馭。乾坤協禹疇。行看靜蛇豕。俱議息貔貅。考有中書第。官無太尉酬。兩京期迅掃。九廟得重修。祉福天方錫。勳庸世未休。斯民納仁壽。公壽幾千秋。

投贈徐平江三十韻

上聖恢方域。吳門翊帝京。千秋季子國。百雉闔閭城。屏翰資良牧。文昌輟貳卿。龍墀虛紫橐。虎節駐紅旌。河潤功初洽。棠陰政已成。農桑歸愷悌。弦管樂升平。世仰韋公譽。人高白傅名。雲樓凌月府。花島爛蓬瀛。香霧凝春晝。橋虹臥曉晴。清規三不惑。盛事四難并。舊俗寧論化。重臨倍有聲。向來宣使指。曾是格刑清。自覲銅魚拜。欣聞竹馬迎。五湖歌吹滿。兩郡吏民爭。公嘗按刑浙右。而自明移蘇。嚴助書頻賜。蕭卿治欲更。還應對宣室。俱議直承明。鼎席猶虛位。戎亭正息兵。安危均注意。中外等持衡。補衮才猷壯。康時智略宏。天津飛驥足。雲路逸鵬程。疇昔參賓從。頑疎荷鑒評。馳驅奉刀筆。談笑接簪纓。夢結閩陬遠。心驚漲潦橫。寄身倖因鮒。盡室道長鯨。官牒霑微祿。恩波拯再生。膺門憐舊契。禰薦及難兄。未釋鹽車駕。徒懷瓦釜鳴。幾年良自哂。一飽定誰營。洛下裘空敝。新豐酒獨傾。知公行入輔。故吏敢言情。

少稷家觀雪賦江字三十韻

雪幕來無際。長吟坐北牕。未嫌光奪月。先恐勢填江。雲色生冰柱。風聲倒石缸。疎簾纔的皪。破屋漸錚鏦。始訝烏能白。旋驚馬盡臙。會朝瓊飾弁。獵較素綢杠。玉帝開宮闕。瑤姬擁旆幢。抑空蜂作陣。窺徑蝶成雙。價重連城璞。明逾釘壁釭。冷烟紛莫辨。凍溜不成淙。計拙夸遼豕。塗窮笑越龍。戴牛迷象齒。覆鹿誤羊羶。酪乳浮茶鼎。花蘂瑩鼓枱。崖枯頻畏住。鵠瘦暫脰肱。共想周王宴。誰虞漢使降。獻衣知念札。加璧殆追逢。蹇駟深憂沒。籃輿重莫扛。淹鍾應預賜。增斗定先撞。短日棲窮巷。豐年卜萬邦。緇塵異羈旅。華髮逐耆龐。

處士欣尋戴。參軍豈遇龐。裘穿心易怯。履敗足微登。荷笠閒垂釣。迴船穩繫樁。清狂時仄帽。泥飲屢空缸。酬唱才皆敵。歌嘲語或咙。閉門嗟懶惰。授簡愧愚惛。戈戟森磨厲。韶鈞富擊拏。絮鹽翻雅況。蘭竹變新腔。取醉華燈爛。催歸戍鼓鼙。晴簷成夜雨。更聽隴頭漉。

